
SUINE
KĒ JIHOVA
VĒ AĜHOĜHO

IBIETA ỌVO

SUINE KE JIHOVA VE AGHOGHO

—1 IKUN RIVIE 15:16

IBIETA OVO

Ode

Ukoko

**A shẹ ọbe nana-a, ọyen ẹbẹre-ọvo rẹ owian rẹ uyono ri
Baibol rẹ akpoeje, re ruẹ womarẹ itetoro ro wonhwo.**

Wọ da guṇọ ru itetoro, biko kpo donate.jw.org.

Suine kẹ Jihova vẹ Aghoghọ—Ibieta Ọvo
“Sing Out Joyfully” to Jehovah—Lyrics Only
A teyenrophia vwe July 2020
Urhobo (sjiyls-UR)

© 2018

Watch Tower Bible and Tract Society of Pennsylvania

Erevwerọphia

Watchtower Bible and Tract Society of
New York, Inc., Wallkill, New York, U.S.A.

A teyenrophia vwe United States of America



sjiyls-UR
200713

Ọrhuẹrẹphiyọ rẹ Iyovwinreta

<i>Jihova</i>	1-12
<i>Jesu/Ọtanhirhe</i>	13-20
<i>Uvie Na</i>	21-24
<i>Ihwo ra Jẹreyọ na vẹ Igodẹ Efa Na</i>	25-27
<i>Oyerinkugbe vẹ Jihova</i>	28-40
<i>Ẹrhovwo</i>	41-47
<i>Omaẹvwọkpahoto</i>	48-52
<i>Iruo rẹ Uvie Na</i>	53-84
<i>Emẹvwa</i>	85-93
<i>Ọbe Ọfuanfon Na</i>	94-98
<i>Iniọvo Avwanre</i>	99-103
<i>Iruemu rẹ Ọghẹẹ</i>	104-130
<i>Orua/Igbeyan</i>	131-138
<i>Iphiẹrophiyọ Avwanre</i>	139-147
<i>Usivwin/Evrẹnushi</i>	148-151

1

Iruemu rẹ Jihova

(Eṣwofia 4:11)

1. Jihov'Ọghenẹ, wẹ yin me vw'ẹgba.
Wọ m'eronvw'eje, wọ vw'arhọ k'avwanre.
A mr'ẹgba wẹn womar'emama wẹn;
Akpọ v'odjuvwu cha dia bẹdẹ.
2. Ọkieje wo vwo brorhiẹn r'abavo.
Irhi wẹn n'eje vw'ukẹcha k'avwanre.
Wo siobon'Ota wẹn vwọ k'avwanre.
O dj'aghwanre wẹn vwọ k'avwanre.
3. Wẹwẹ y'Ọghenẹ ro me vw'ẹguonọ.
Ẹguonọ wẹn na yen ma rho kparobọ.
Ode wẹn na v'iruemu wẹn n'eje,
E che ghwoghw'ayen vwọ ru'akpọjeje.

1. Ọghẹnẹ r'uyota,
 Ọghẹnẹ ri bẹvwẹdẹ,
 Wẹ yen m'erọnvw'ejobi,
 Jihova y'ode wẹn.
 Wẹ yen ch'avwanr'uko
 Vwọ mr'ukoko wẹn vughe,
 Vwo ghwoghw'urinrin wẹn na
 Vwọ ru'akpọ n'ejobi.

(EKUO)

*Jihova, Jihova,
 A mrẹ vwo dje we rẹ.
 Vw'obodjuvwu v'otorakpọ
 Wẹw'ovo y'Ọghẹnẹ.
 Ihworakpọ na cha riẹn nẹ
 Wẹwẹ yin me vw'ẹgba.
 Jihova, Jihova,
 Wẹw'ovo y'Ọghẹnẹ bẹdẹ.*

2. Wọ k'avwanr'ogangan
Vwo ru'obo wọ guṇṇore,
Vwo ru'ṇṇore w'ejobi,
Jihova y'ode wẹn.
Avwanr'iseri wẹn,
Ọy'ode wo s'avwanre.
Oma kọ vwerh'avwanre
Ifikir'ode wẹn.

(*Ekua*)

*Egba, Iphierophiyọ, vẹ
Imuẹro rẹ Avwanre*
(Isẹ 14:26)

1. Jihova, wẹwẹ yen k'avwanre
iphierophiyọ na;
Omamọ r'iphierophiyọ,
je ghwoghwo k'akpọje.
J'ọkiọvo ebẹnbẹn r'akpọ na
sa nẹrh'oshọ mu'avwanre.
Ọ me nẹrh'iphierophiyọ
r'avwanre shekpoto.

(EKUO)

Wẹ y'ẹgba, v'iphierophiyọ r'avwanre.

Wẹ yen vw'ukẹcha k'avwanre.

Vw'iruo r'aghwoghwo na,

wọ k'avwanr'ẹgba.

Owẹ y'avwanre vwẹroso.

2. Jihova, biko gbe j'avwanre
nabọ karophiyọ
N'owẹ yen k'avwanr'uchebro
vw'ọke r'edavwini.
E gbe ja karophiy'ọnana,
Ọ cha nẹh'avwanre gan,
Ọ cha nẹhe fiudugberi
vwo ghwoghw'ode wẹn na.

(*Ekua*)

1. Jihov'Ọghẹnẹ y'Osun mẹ;
Mi nen'odjeke rọyen.
O vugh'iroro r'ubiudu mẹ,
O nabọ ri'odavwẹ mẹ.
O sun vwe kp'omamọ r'asan,
Asan me da mr'ufuoma.
O nabọ sun vwe womar'ẹguṇọ,
Me sa vwọ mr'ebruphiyọ.
O nabọ sun vwe vwọr'ẹguṇọ,
Me sa vwọ mr'ebruphiyọ.
2. Idjerhe w'ejobi fuoma,
Mi che nen'uchebro wẹn.
Biko chonvwuko vwọ yonregan,
Ru'esegbuyota mẹ gan.
Biko ji vw'ukẹcha kẹ vwe
Vwọ vrabọ r'ukpokpogho.
Wẹwẹ y'Ugbeyan kugb'Ọghẹnẹ mẹ,
Oshọ che se mu vwe rẹ.
Wẹwẹ y'Ugbeyan v'Ọghẹnẹ mẹ,
Oshọ che se mu vwe rẹ.

3. Jihova, wẹwẹ y'Osun mẹ;
Me yan nen'idjerhe wẹn.
Wọ bọn vwe gan je kẹ vw'ufuoma,
Wo ru'odavwẹ m'ejobi.
Wẹwẹ y'Oghẹnẹ ri bẹdẹ,
Me nabọ vweros'owẹ.
Biko gbe dj'ẹguọno kẹ vwe bẹdẹ,
Wọ me je vwerote vwe.
Biko dj'ẹguọno kẹ vwe bẹdẹ,
Wọ me je vwerote vwe.

1. Jihova, wẹ yen nabọ riẹn vwe,
Mi de sherhẹn, kugb'ọke mi de vřen.
Wọ ri'ewẹn mẹ v'ọdavwẹ r'ubiudu mẹ.
Obo me ta v'uruemu mẹ,
wọ ri'ay'eje.

Wọ je mẹ vwe vw'evun r'oni mẹ,
Wọ mr'oma mẹ kugb'ibeku m'eje.
Wọ mr'enana, wo si'ay'eje phiyotọ.
Mi jir'uwe fikir'iruo
r'igbunu wẹn.

Erianriẹn wẹn, e vọnre v'igbevunu.
Me ri'ọnana, o ji muvwẹro dẹn.
Me da djoshọ n'ebri che ji rhurh'uvwe,
Ọghenẹ mẹ, wọ cha mẹ vwe ghene.

Tivọ me sa djẹ ra, Jihova,
De siomanu ru wo de juvw'ẹmẹ?
Tọ di'igbenu yẹr'asan ri kodori,
Tọ di'abadi, tọ je di'ebri,
wọ cha mẹ vwe.

6

Idjuvwu na Ghwoghwo Urinrin rẹ Ọghẹnẹ

(Une Rẹ Ejiro 19)

1. Jihova yen m'odjuvwu na v'akpọ na.

Emama rọy'eje

ghwoghw'urinrin rọyen.

Isio n'eje vw'ujiri k'Ọghẹnẹ.

I dj'aghwanre rọyen vwọphia

Kugb'ẹguonọ rọyen.

2. Uchebro ri Jihova yen k'ohw'arhọ.

Ọ rey'irhi rọyen

vwo su'avwanr'ejobi.

Iji rọyen, a mrẹ vwo dj'ayen rẹ.

Eta rọyen k'ohw'aghoghọ,

E vọnre v'imuẹro.

3. E ja djoshọ ri Jihova bẹvwẹdẹ.

Uchebro rọy'eje

yovwin vr'omam'oro.

Iji rọyen sẹro r'avwanr'eje.

E je ghwoghw'odẹ r'Ọghẹnẹ

K'ihwo r'akpọneje.

7 *Jihova, Ọyehe Ogangan re Avwanre* (Aizaya 12:2)

1. Jihov'Ọghẹnẹ, Ọromevwẹgba,
Wẹ yen vw'ẹgba v'ogangan k'avwanre.
Avwanre che ruiruo r'aghwoghwo na,
Dede n'ihw'evo cha vwosu'avwanre.

(Ekuo)

*Jihov'Ọghẹnẹ, Wẹwẹ y'Oragha.
Je ghwoghwo'ode wẹn t'ason t'uvo.
Jihov'Ọghẹnẹ, Ọromevwẹgba,
Wẹw'ovo y'avwanre cha vweroso.*

2. Oma nabọ vwerh'avwanr'ejobi,
R'avwanre vwọ mr'ukoko wẹn vughe.
Obo wọ tar'ejobi che rugba,
Avwanre cha vw'ẹga kẹ wẹ bẹdẹ.

(Ekuo)

3. Avwanre che ru'ohọre wẹn bẹdẹ.
Dede n'Eshu tobọ vwosu'avwanre,
Wẹwẹ y'avwanre je vwerovwoso.
Biko ch'avwanr'uko vwọ yonre gan.

(Ekuo)

8 *Jihova Yen Adjarhọ rẹ Avwanre* (Une Rẹ Ejiro 91)

1. Jihova, ọy'adjarhọ
 R'avwanre vwẹroso.
 E ja di'oto r'ibekpe
 Rọyen ọkineje.
 Ọ vwẹrot'idibo rọyen,
 J'avwanr'eje vwẹrovwọsuọ.
 Jihova ọy'adjarhọ,
 Ọ cha sẹro r'ihwo rọyen.
2. Dede n'ihwo uriorin
 Che she vw'akọkọ wẹn,
 Ọ cha sẹro r'ihw'eje
 Re yonr'irhi rọyen.
 Wọ cha vrabọ r'ukpokpogho,
 Wo j'oshọ vuọvo mu we rẹ.
 Jihova che rhurh'uwe
 Vwo n'omaẹwan kugb'imuoshọ.
3. Ọ cha sẹro r'avwanre
 Vrabọ r'edavwini,
 Ọ je cha ch'avwanr'uko
 Vrabọ r'ukpokpoma.
 Oshọ che se mu'avwanre rẹ,
 Udu ji che br'avwanre rẹ.
 Jihova ọy'adjarhọ,
 O biẹch'avwanre ọkieje.

9 *Jihova Yen Ovie rẹ Avwanre!* (Une Rẹ Ejiro 97:1)

1. Ghoghọ, vw'urinrin ki Jihova.
Emama n'ejobi vw'ujiri vwọ kẹ.
E j'avwanre suine r'ujiri k'Ọghẹnẹ.
E je ghwoghw'iruo rọyen k'ihwo.

(EKUO)

*J'idjuvwu na ghoghọ, J'oma vwerh'akpọ na.
Jihova y'Ovie r'avwanr'eje!
J'idjuvwu na ghoghọ, J'oma vwerh'akpọ na.
Jihova y'Ovie r'avwanr'eje!*

2. Jihova y'Ọghẹnẹ r'avwanre.
E je ghwoghw'urinrin rọyen k'ihw'eje.
Ọ'y'Ovie r'avwanre, e ja vw'ẹga vwọ kẹ.
E j'avwanre vw'ujiri vwọ kẹ.

(Ekuo)

3. Ọ rey'Uvie rọyen vwo mure.
Jesu Kristi yen cha di'Ovie r'Uvie na.
Jihova, y'Ọghẹnẹ ro muwan r'ujiri,
Ọ cha phoph'eghẹnẹ refian na.

(Ekuo)

Jiri Jihova!

(Une Rẹ Ejiro 145:12)

1. Jiri Jah! Jiri Jihova!

Ghwoghw'odẹ rọyen vwọ k'ihwo!
 Ghwoghwo phia! Vw'ukẹcha k'ihwo,
 Ẹdẹ rode na sikẹri re!
 Jihova vwi Jesu Kristi mu'Ovie
 Ro che sun vw'akpọ n'ejobi.
 Gbe ghwoghw'Uvie r'Ọghẹnẹ vwọ k'ihwo,
 Ji ghwoghw'ebruphiyọ rọyen!

(EKUO)

Jiri Jah! Jiri Jihova!

Ghwoghw'odẹ rọyen vwọ k'akpọje!

2. Jiri Jah! Jir'odẹ rọyen!

Sune vwo jiro ọkieje!
 Gbe jiro V'ubiudu w'eje.
 E je ghwoghw'odẹ rọyen k'ihwo.
 Jihov'Ọghẹnẹ, Ọ vọnre v'ẹgba,
 O dj'ẹguọno k'ihw'ejobi.
 O che ru'ọdavwẹ r'avwanr'ejobi,
 O che ny'ẹrhovwo r'avwanre.

(Ekuo)

1. Oghene mẹ, iruo wẹn v'akpo na.
 Idjuvwu na, je vọn v'iruo wẹn na.
 Emama na vw'ujiri vwọ kẹ wẹ.
 Vw'akponeje, e suine vwọ kẹ wẹ.
 Emama na vw'ujiri vwọ kẹ wẹ.
 Vw'akponeje, e suine vwọ kẹ wẹ.
2. Oshoedje wẹn nẹh'ohwo vw'aghwanre.
 Uchebro wẹn yen wo vwo su'avwanre.
 Irhi w'eje vw'ebruba k'avwanre.
 Eta w'eje vw'aghoghọ k'avwanre.
 Irhi w'eje vw'ebruba k'avwanre.
 Eta w'eje vw'aghoghọ k'avwanre.
3. Erianriẹn wẹn cha vw'arhọ k'avwanre.
 Eta w'eje cha sẹro r'avwanre.
 Avwanre de muoghọ vwọ k'ode wẹn,
 Ke che vw'arhọ kugb'omavwerhovwẹn.
 Avwanre de muoghọ vwọ k'ode wẹn,
 Ke che vw'arhọ kugb'omavwerhovwẹn.

12 *Jihova, Ọghẹnẹ ro Me Kpenu* (Eyanno 34:6, 7)

1. Jihov'Ọghẹnẹ, wẹ yen m'avwanre;
 Wẹwẹ y'avwanre cha ga,
 Avwanre cha kerhọ wẹ.
 Wo ji vw'ẹguonọ, ẹgba v'aghwanre.
 Wẹ y'Ọghẹnẹ ri bẹdẹ.
2. Wẹwẹ kobiruo, Ọsẹ r'avwanre;
 Wọ vọnre v'arodonvwẹ,
 Wo ny'ẹrhovwo r'avwanre.
 Wo yon'avwanre, sẹro r'avwanre.
 Avwanre vweros'owẹ.
3. Akpọ v'odjuvwu suine vwọ kẹ wẹ.
 Avwanre che jir'uwe,
 Ji vw'urinrin vwọ kẹ wẹ.
 Jihov'Ọghẹnẹ, Ọsẹ r'avwanre,
 J'avwanre ga wẹ bẹdẹ.

1. Jihova vw'ẹguonọ
R'ihworakpọ n'eje.
O ji'Ọmọ royen no rhi ghwu k'avwanre.
Jesu vwọ rhi'akpọ na,
O dj'ẹguonọ k'ihwo,
Ọ nabọ muoghọ k'ode r'Ọghẹẹ.
2. Jesu ji vw'ẹguonọ
R'ota ri Jihova.
O de vw'erianriẹn, O de ji vw'aghwanre.
Jesu vwomakpotọ
Vwo nyẹme r'Ọghẹẹ.
Ọ nẹh'Ọghẹẹ vw'omavwerhovwẹn.
3. E gbe j'avwanr'eje
Vwẹrokeri Jesu,
Je ru'obo re cha Ghw'aghoghọ rh'Ọghẹẹ.
E de neni Jesu
Vw'akpọ r'avwanr'eje,
Ke che vw'ebruba V'arhọ ri bẹẹ.

Jiri Ovie Kpokpo ro Che Sun Akpo Na (Une Rẹ Ejiro 2:12)

1. Ihwo buebun yin koko
vwo n'ẹkuoto r'akpọneje,
Jesu v'ihwo ra jẹreyo
yin kok'ihwo nan'eje.
A vw'Uvie r'Ọghẹnẹ mure;
O che ru'ọhọre r'Ọghẹnẹ.
Ọn'obọdẹn r'iphierophiyọ
Rọ cha ghw'aghoghọ rh'ihw'eje.

(EKUO)

*Jiri Jihov'Ọghẹnẹ, vi Jesu Kristi,
Ovie r'ivie, ro che su'akpọeje
E ja vwomakpotọ k'usuon royen.
Jir'Ọghẹnẹ bẹvwẹdẹ.*

2. E j'avwanre kuvwie vwọ ki Jesu,
Ovie r'avwanre.
O che guẹdjọ r'akpọneje
ji vw'usivwin k'avwanre.
Oviẹ v'uvweri cha dia rẹ,
Oshọ rha cha dia akpo na rẹ.
Ọ je cha rhonvw'ihwo ri ghwuru.
Oma kọ cha vwerh'ihw'eje.

(Ekuo)

1. Jiri Jesu Kristi,
 Ọmọkpako r'Ọghẹnẹ,
 Ovie r'Ọghẹnẹ vwo mu,
 Rọ cha ghw'ebruba vwọ rhe.
 O muogho vwọ k'Ọghẹnẹ,
 Ji vw'eguonọ rọyen.
 O che titi Jihova,
 Ji tit'usuon rọyen.

(EKUO)

*Jiri Jesu Kristi,
 Ovie r'Ọghẹnẹ vwo mu.
 Vw'ugbenu ri Zayoni,
 Usuon na tonphiyo re!*

2. Jiri Jesu Kristi,
 Ohwo ro ghwu k'avwanre.
 Womar'otanhirhe na,
 Ke se vw'arho ri bẹdẹ.
 Oronvwe ri Jesu na
 V'ihwo ra jẹreyọ,
 Cha ghw'urinrin rh'Ọghẹnẹ,
 Ji tit'Uvie rọyen.

(Ekuo)

*Jiri Jihova Fikire
Omọ Royen ro Vwo Mu*
(Eṽwophia 21:2)

1. Jihova vwi Jesu vwo mu
Ovie ro che su'ihw'eje.
O che sun vw'idjerhe r'ṽwata,
O che ru'ṽhore r'ṽghene.

(Ekuo)

*Jiri Jah nọ vw'Omọ royen mu.
Kuvwie ki Jesu, igode,
Re vwomakpotọ nene okieje,
je yonr'irhi roy'eje.
Jiri Jah nọ vw'Omọ royen mu
Ovie ro suen vw'odjuvwu re.
Jesu che ru'ode r'ṽghene fuanfon
o ji che phikparobọ.*

2. ṽghene yen j'ihwo reyo
Vwọ di'iniṽvo ri Kristi.
Ihwo nana che sun vw'Uvie na,
Akpọ na cha di'iparadais.

(Ekuo)

1. Jesu vwọ rhi'otorakpọ na,
O dj'uruemu'esiri k'ihwo.
O vw'eta v'uruemu
Vwo dj'eguonọ phia.
O ji gb'arodonvwẹ k'ihwo.
O ru'odavwẹ r'ihworakpọ,
O sivw'ihwo re họtvw'oga.
Jesu nabọ ghwor'oke v'ihw'eje,
O je vw'ukẹcha vwọ k'ayen.
2. Vw'akpeyeren r'avwanr'eje,
E ja vwẹrokeri Jesu.
E je ghwoghwota na
Vwọ k'ihw'ejobi.
E je dj'eguonọ k'iniọvo.
Vw'ukẹcha k'emọphrorivwin,
Ji vw'ukẹcha vwọ k'eyauku.
Ihwo de bru we rhe vwọ k'ukẹcha,
Wọ me vw'ukẹcha vwọ k'ayen.

Dje Ọdavwaro Phia Vwọ kẹ Ọtanhirhe Na

(Luk 22:20)

1. Jihova Ọghẹ,

avwanre bruwerhe,
Wo dj'ẹguṇṇọ rọ ma rho
kparobọ k'avwanre.
Wo siobon'Ọmọ wẹn
avwanre vwo vw'arhọ.
Izobo nana y'okẹ
rọ ma rho kparobọ.

(EKUO)

*Ọ vw'arhọ rọyen k'avwanre.
Ọbara rọyen sivw'ihwo.
V'ubiudu'eje,
avwanre kpẹvw'owẹ bẹdi bẹde.*

2. Jesu Kristi vw'arhọ rọyen
vwọ kpahoto.
Ẹguṇṇọ yin muro vwo
rhi ghwu vwọ k'avwanre.
Ọyen nẹrh'avwanre
rhi vw'iphiẹrophiyọ.
Iphiẹrophiyọ nana
ọ r'arhọ ri bẹde.

(Ekuo)

19 *Emu Ovwonvwon re Orovwori Na*

(Matiu 26:26-30)

1. Jihova, Oghene r'avwanre.
 Onan'ason r'ogheresan.
Wew'Ohwo r'uyota, wo dj'eguono vwophia,
 Wo dj'egba v'aghwanre wen phia.
E hw'omogode r'Owanvre na,
 Ihwo wen de rhi vw'usivwin.
A vw'omogode na vwo dji Jesu Kristi,
 Ro rhi ghwu vwọ k'avwanr'ejobi.
2. Jesu vw'arho royen kpahoto;
 Onana y'oke ro ma rho.
Jesu vwọ rhi'akpo na,
 o nyupho r'Oghene,
 O de ji ghwu vwọ k'avwanre.
E gbe j'avwanre karophiyọ
 Eguono ro dje k'avwanre.
Ughwu royen na koyen t'avwanre hirhe.
 E je ru'ekarophiyọ royen.

3. Avwanre kokori vw'etinẹ.

Wẹwẹ yin durhi'avwanr'eje.

Avwanre jir'uwe fikir'ẹguṇṇọ wẹn,

Ji vw'akpẹvwẹ vwọ k'Ọmọ wẹn.

Biko gbe j'Ẹkarophiyọ na

Ghw'urinrin v'oghọ rh'ode wẹn.

E gbe ja vwẹrokeri Jesu ọkieje,

E se vwo vw'arhọ ri bẹvwẹdẹ.

20 *Wo Siobonu Ọmọ Ọghanghanre Wẹn* (1 Jọn 4:9)

1. Jihova Ọghẹnẹ,
 Wọ t'avwanre hirhe.
Izobo r'Ọmọ wẹn
 Vw'arhọ k'avwanre!
Avwanre cha ga wẹ
 V'ẹgba r'avwanr'eje.
Ji ghwoghwo vwọ k'ihwo,
 E vwo ru'ọhọre wẹn.

(EKUO)

*Wo siobonu'Ọmọ wẹn,
 Avwanre jir'uwe,
Sune r'ujiri bẹdẹ
 wọ vwọ k'avwanre Ọmọ wẹn.*

2. Aruẹdọn v'iruo wẹn
Si'avwanre kẹrowẹ.
Ka nabọ ri'ode wẹn,
Ji vw'ẹguonọ wẹ.
J'obo re ma ghanre,
Y'okẹ wọ k'avwanre:
Wo siobon'Ọmọ wẹn,
No rhi ghwu k'avwanre.

(Ekuo)

(OKUPHIYỌ)

Jihova Ọghẹnẹ, avwanre jir'uwe.
Avwanre kpẹvw'owẹ fikir'okẹ r'Ọmọ wẹn.

1. E je ghwoghw'Uvie r'Ọghẹnẹ,
 Ọ cha ghw'ebruphiyọ rhe.
 Uvie na ghanre k'Ọghẹnẹ,
 Ọ je nẹrh'oma vwerhọn.

(Ekuo)

*Gba ka guṇọ'Uvie r'Ọghẹnẹ,
 Je guṇọ'ọvwata rọyen.
 Fuevun gi Jihov'Ọghẹnẹ,
 Sune r'ujiri vwọ kẹ.*

2. Wọ ru'ẹnwan r'obo wọ cha re
 Kugb'obo wọ cha da rẹ.
 Ọghẹnẹ cha vwerote we,
 Wọ da guṇọ'Uvie rọyen.

(Ekuo)

3. Gbe je ghwoghw'Uvie r'Ọghẹnẹ,
 E ja vw'ukẹcha k'ihwo,
 Ayen vwọ vwerosu'Ọghẹnẹ,
 Je vweros'Usuon rọyen.

(Ekuo)

Uvie na Sụen Re
—E jẹ Ọ Rhe!
 (Ẹvwọphia 11:15; 12:10)

1. Jihova, Osun r'avwanre,
 Ọghẹnẹ ri bẹdẹ.
 Wọ vw'usuon na k'Ọmọ wẹn re;
 Wọ je vw'ogangan kẹ.
 Wọ rey'Uvie wẹn vwo mu re;
 Uvie ro che su'akpọneje.

(EKUO)

Usivwin wẹn rhire,
Uvie v'ogangan wẹn rhire.
Uvie wẹn na sụen re.
Biko E jọ rhe, E jọ rhe!

2. Ọke ra k'Eshu kẹrire;
 Kọ su'ojaeriọ k'ihwo.
 Dede n'akpọ na pha brabra,
 Erọnvwọn che yovwin.
 Wọ rey'Uvie wẹn vwo mu re;
 Uvie ro che su'akpọneje.

(Ekuo)

3. Aghoghọ vwọ k'emekashe,
Oma ra vwerh'ayen.
A dj'Eshu n'obodjuvwu re,
Oma fu'odjuvwu re.
Wọ rey'Uvie wẹn vwo mu re;
Uvie ro che su'akpọneje.

(Ekuo)

1. Uvie r'Ọghẹnẹ suẹn re,
 E je jir'Ọmọ rọyen.
 Jesu che sun vwo n'obodjuvwu rhe.
 Ja sune jir'Ọghẹnẹ,
 Une r'omavwerhovwẹn.
 A reyi Jesu vwo mu'Ovie r'akpọneje.

(EKUO)

*Die y'Uvie na che ru k'avwanre?
 O che si'oja v'ebẹnben no.
 Uvie nana ji che si'ughwu no,
 Ke che vw'arhọ ri bẹvwẹdẹ.
 E ja vw'ujiri k'Ọghẹnẹ
 Fikir'ẹguọno rọyen.*

2. Jesu t'usuon phiyọ re,
 Amagidon kẹrire.
 Oghwọrọ r'Eshu ji sikẹri re.
 E j'avwanre davwẹngba
 Vwo ghwoghwota k'ihw'eje.
 E ja vw'ukẹcha vwọ k'ayen
 vwo mudia gan.

(Ekuo)

3. J'avwanre jiri Jesu,

E ja vw'urinrin vwọ kẹ.

E je muogho vwọ k'Ovie r'avwanre.

E gbe ja kpẹvw'Oghẹ

Vwọ k'eburphiyo royen.

Uvie ri Jesu Kristi che su'akpọneje.

(Ekuo)

1. Kpar'opharo kpenu.

Mr'ugbenu ri Jihova,
Ro me kpenu kparobọ
Vw'ọke r'avwanre na.

Ihwo vw'akpọneje,
Vwevunr'ẹkuotọ n'ẹje,
Ayen ki durh'ihwo
ne rhe vw'ẹga k'Ọghẹne.

Ọke na te nure,
Imihwo cha di'ẹgborho rode.
Re vwo buẹnphiyo na,
A cha mr'ebruphiyo r'Ọghẹne.

Ihwo buebun nana
Vw'ẹga vwọ ki Jihova,
Ayen fuevun vwọ kẹ,
Je vwomakpotọ vwọ kẹ.

2. Jesu yin j'urhi na

Ne re ghwoghwota k'ihwo;
Ovụẹ r'Uvie r'Ọghẹnẹ
Y'avwanre che ghwoghwo.

Jesu Kristi suẹn re,
O vw'ẹguonọ r'ihw'eje;
Ihwo ri nyupho rọyen,
Re djoshọ r'Ọghẹnẹ.

Ọn'emu r'aghoghọ R'ihwo
r'Ọghẹnẹ vwo buẹnphiyo.
J'avwanre davwengba
Vwọ vw'ukẹcha vwọ k'ihwo n'eje.

E gbe j'avwanr'eje
Durh'ihwo rhe g'Ọghẹnẹ
Vw'ugbenu ri Jihova
Rọ cha dia bẹvwẹdẹ.

1. Oghẹnẹ vw'ihwo kpokpọ,
Ihwo ra jereyo na.
O kok'ayen n'akpọ na,
O ji bruba k'ayen.

(EKUO)

*Ihwo ra jereyo,
Ey'ihwo vwọ k'ode wẹn.
Ay'eje jir'uwe,
Ji ghwoghw'ode wẹn vw'akpọneje.*

2. Ihwo ra jereyo na,
E nabọ yonr'ota na.
'Ghẹnẹ si'ayen vwo n'ebri
Vwọ rhi'urhukpẹ rọyen.

(Ekuo)

3. Ayen ruiruo ra k'ayen,
Vwo kok'igod'efa na.
Ayen fuevun ki Jesu,
Je yonr'irhi rọyen.

(Ekuo)

1. Jesu vw'igod'efa, re vw'ukẹcha vwọ kẹ
e ra jẹreyọ na; ọpha ri Kristi.
Erọnvw'ejobi re ruru
vwọ ch'ay'uko,
O muegbe rọ vwọ hwosa na vwọ k'ayen.

(EKUO)

“Ovwan da ch'ay'uko, 'vwan je chọnvwuko.
Wo de ruo vwọ k'ayen, wo ruro kẹ vwẹ.
Obo wo ru k'ayen, wo ruro kẹ vwẹ.
Wo ruro k'ayen, wo ruro kẹ vwẹ.
Wo de ruo vwọ k'ayen, wo ruro kẹ vwẹ.”

2. “Wọ vw'ukẹcha kẹ vwẹ owẹnvwe vwo hwe vwe;
ọdavwẹ m'ejobi, wo ru'ayen kẹ vwẹ.”
K'ayen cha nọ:
“Ọke vọ y'avwanre vwo ruo?”
Ọnana y'obo r'Ovie na cha vu'ayen:

(Ekuo)

3. “Ovwan fuevun kẹ vwẹ vwo ruiruo r'esiri,
ovwan v'iniọvo mẹ yin ghwoghwota na.”
Ovie na kọ vu'igodẹ
r'oborhen rọyen:
“Vw'akpọ na vwọ riuku v'omavwerhovwẹn.”

(Ekuo)

27 *E Dje Emọ rẹ Ọghẹnẹ Vwọphia* (Rom 8:19)

1. Ọmọke křen Ọghẹnẹ che
Dj'emọ rọyen vwọphia.
Ayen vi Jesu ki che sun
Vw'uvie r'odjuvwu na.

(EKUO)

*E dj'emọ r'Ọghẹnẹ vwọphia
v'Onini na, Jesu.
Ay'eje che phikparobọ,
Je mr'ebruba rọyen.*

2. Ọmọke křen i ri chekọ
Che ny'use r'odjuvwu.
Ovie r'ivie v'Ọrovwori
Cha rey'ay'ejobi.

(Ekuo)

(URHIẸ)

Ihwo nana vi Jesu che
Phi'ofovwin rọ koba.
Oronvwe rayen vi Jesu
Cha dia bẹdi bẹde.

(Ekuo)

1. Ono y'ugbeyan wẹn?

Ono di'uwevwin wẹn?

Ono yen wọ sa vwẹrovwọso?

Ono nabọ riẹn wẹ?

Ohwo ro nyota wẹn,

Ro se we gbuyota,

Rọ vwomakpotọ, rọ je fuevun,

Ro nen'irhi w'eje.

2. Ono y'ugbeyan wẹn?

Ono se bru we rhe?

Ono yen nẹrh'oma vwerh'owẹ,

Ru wọ ri'ode rọyen?

O ro tit'ode wẹn,

Ohwo ro nyupho wẹn.

Ohwo r'uyota, rọ je fuevun,

Ra sa vwẹrovwọso.

3. Ẹnwan r'avwanr'eje,

E phiro y'obọ wẹn.

Si'avwanre koko vwọr'ẹguọno,

Vwẹrovwot'avwanre.

E j'avwanr'ejobi,

Di'igbeyan wẹn bẹdẹ.

Wẹ y'ugbeyan rọ rho kparobọ,

A mrẹ vwo dje we rẹ.

29 *Yeren Akpọ ro Fo Ode rẹ Avwanre* (Aizaya 43:10-12)

1. Wẹwẹ, Jihova, y'Ọghẹnẹ ri bẹdẹ.

Wo vw'ogangan, wo ji dj'ẹguṇọ phia.

Ovie r'avwanre, Ọghẹnẹ r'uyota;

A mrẹ vwo dj'ẹgba v'aghwanre wẹn rẹ.

Avwanre ghene guṇọ vw'ẹga kẹ wẹ,

Ji ghwoghw'Uvie wẹn v'omavwerhovwẹn.

(EKUO)

Avwanr'eje Iseri ri Jihova,

E gbe j'avwanre yerin mu'ode na.

2. Je kuomakugbe vwọ vw'ẹga k'Ọghẹnẹ,

Ọ cha nẹrhe vw'ẹguṇọ v'ufuoma.

E gbe j'avwanre yonr'irhi r'Ọghẹnẹ,

Ke che vw'ebruba v'omavwerhovwẹn.

A vw'ode wẹn ri'avwanre vw'akpọneje.

Ch'avwanr'uko vwo ru'ode na fuanfon.

(Ekuo)

Ọsẹ Mẹ, Ọghẹnẹ Mẹ
Kugbe Ugbeyan Mẹ
 (Hibru 6:10)

1. Akpọ nana pha brabra,
 Akpọ nana vọnre v'odjadja.
 Je me je cha g'Ọghẹnẹ,
 Mi vw'iphiẹrophiyọ.

(EKUO)

*'Ghẹnẹ di'orumwemwu rẹ,
 Ọ karophiyọ ẹguonọ mẹ.
 Ọ nabọ siker'ovwẹ,
 Vi Jihova, me djoshọ rẹ.
 'Ghẹnẹ yen vwẹrote vwe,
 ọyen sẹro mẹ ọkineje.
 Ọy'Ọghẹnẹ v'Ugbeyan mẹ,
 Kugb'Ọsẹ mẹ.*

2. Ọkieghene mẹ wanre,
 Ọke r'oghwo ji te vw'oma re.
 Womar'esegbuyota
 Mi vw'iphiẹrophiyọ.

(Ekuo)

1. Gbe nen'Ọghẹẹ yan kugbe,
Wọ me di'ohwo r'uyota.
Siker'Ọghẹẹ je vwerovwosu,
Ọ cha vw'ukẹcha kẹ wẹ.
Gba nabọ vwerosu'Ota rọyen,
Oma kọ vwerh'owẹ.
Wọ me je kerhọ r'Ọghẹẹ,
Kọ cha vwerovwote we.
2. Gbe nen'Ọghẹẹ yan kugbe,
Wọ me di'ohwo r'ofuanfon.
Edavwini da tobọ te w'oma,
Ọ cha vw'ukẹcha kẹ wẹ.
Erọnvw'ejobi ri f'ujiri
V'erọnvwọn r'uyota,
Wọ da vw'ọkieje ror'ayen,
Ọghẹẹ ko bicha wẹ.
3. Gbe nen'Ọghẹẹ yan kugbe,
Wo mi vw'omavwerhovwẹn.
Dj'ọdavwaro phia vwọ k'iruo rọyen
V'ebruba r'akpọ kpokpọ.
Wo mi nen'Ọghẹẹ yan kugbe,
Sune r'ujiri kẹ.
Ihw'ejobi ke je cha rịen
Ni Jihova yu wọ ga.

1. Ọkẹ r'awwanre vwo kp'ẹga refian,
lyono rayen nẹrh'ofu dj'ohwo.
Re rhi vwo nyo kpah'Uvie r'Ọghẹnẹ,
Oma da vwerh'avwanre.

(EKUO)

*K'ẹ̀bẹ̀rẹ̀ Jihova; Jọ di'ugbeyan wẹn.
Ọ cha sa sen wẹ rẹ; Yan vw'elo rọyen.
Ghwoghw'Uvie r'Ọghẹnẹ Vwọ ru'akpọneje.
Usuon r'Ọmọ rọyen Cha dia bẹvwẹdẹ.*

2. Avwanre cha k'ẹ̀bẹ̀rẹ̀ r'Ọghẹnẹ.
E je ghwoghw'Uvie na vwọ ru'akpọneje.
Vw'ukẹcha k'ihwo rhe vwọ ri'Ọghẹnẹ,
Oba na sikẹri re.

(Ekuo)

3. Avwanre cha sa djoshọ r'Eshu rẹ.
Jihov'Ọghẹnẹ cha ch'avwanr'uko.
Ọ cha vw'ogangan v'ẹgba k'avwanre,
O ji che bich'avwanre.

(Ekuo)

1. “Biko ny’ore mẹ,” Jihova,
 Ny’oyare v’erhovwo mẹ.
 Biko mr’oja v’ebẹnbẹn mẹ,
 Gba vw’ukecha vwọ kẹ vwẹ.

(Ekuo)

*Mu’oghwa wẹn vwọ ki Jihova,
 Ọ cha sẹro wẹ ji bicha wẹ.
 Gba je nabọ vwẹrovwọsuọ,
 Ọ cha yan juwewwo rẹ.*

2. Mi de ji vw’ibekpe r’ophran,
 Me cha rhan j’ebẹnbẹn vwo,
 Vwo kp’asan mi de vw’ufuoma,
 Rọ je vrabọ r’utuoma.

(Ekuo)

3. E ja vwẹrosui Jihova,
 A cha mr’ufuoma rọyen.
 O vw’ẹguonọ r’avwanr’eje,
 O che mu’oghwa r’avwanre.

(Ekuo)

1. Oghenẹ mẹ, me cha fuevun kẹ wẹ;
 Me je cha yonre gan, me vwerovwos'owẹ.
 Gba fuẹr'ovwẹ, wọ je davw'ovwẹ ni;
 R'ubiudu mẹ fuanfon, me sa vwọ mr'ebruba.

(Ekuo)

*Mi brorhiẹn na, Mi muegbe r'ẹwẹn mẹ
 ne me cha yonre gan, Je ga wẹ bẹvwẹdẹ.*

2. Me kẹnoma vwọ k'irumwemwu na.
 Mi vw'utuoma r'ihwo ri yer'akpọ r'efian.
 Wọ ghwor'ovwẹ v'irumwemwu na rẹ;
 Ihwo r'abọ rayen vone v'ohwekufia.

(Ekuo)

3. Mi vw'ẹguonọ me vwọ di'uwevwin wẹn.
 Ẹga wẹn pha fuanfon, me cha ga wẹ bẹdẹ.
 Me cha gọlọ vwevunr'uwevwin wẹn,
 Ji ghwoghwh'urinrin wẹn vwevunr'akpọneje.

(Ekuo)

Tɛnrovi Obo re Ma Ghanre

(Filipae 1:10)

1. A sa vwọ riẹn erọnvwọn r'uyota
K'avwanre che vw'aghwanre,
A sa vwọ riẹn obo re ma ghanre
V'obo ro fori ne ru.

(Ekuo)

Gba vw'ọkieje Vwo ru'erhuvwu.

Oma kọ cha

Vwerh'Ọghẹnẹ ko che bruba kẹ wẹ,

Je sẹro wẹ.

E gbe ru'erọnvwọn re ma ghanre!

2. Ki die yen ma ghanre vwọ vr'ovuẹ r'Uvie na
R'avwanre ghwoghwo,
Rọ nẹrh'ihwo sa ri'Ọghẹnẹ,
Je nẹrh'ayen vw'iphiẹrophiyọ?

(Ekuo)

3. A da nabọ ru'obo re ma ghanre
Ke che vw'omavwerhovwẹn.
Ọ cha nẹrh'avwanre vw'ufuoma v'aghoghọ
Kugb'eburuphiyọ.

(Ekuo)

36 *Avwanre Sero rẹ Ubiudu Avwanre*

(Isẹ 4:23)

1. E ja sẹro r'ubiudu na,
 Ọ cha nẹrhe vw'arhọ.
Jihova fuẹr'ubiudu na,
 Ọ nabọ ri'avwanre.
Ubiudu na sa phi'avwanre,
 Ọ me nẹrha yan chọ.
Wọ da sẹro r'ubiudu na
 Ku wọ cha mr'aghoghọ.
2. Wọ ke nẹrhovwo k'Ọghẹnẹ
 Muẹgbe r'ubiudu wẹn.
Kpẹvw'Ọghẹnẹ, vw'ujiri kẹ.
 T'ọdavwẹ wẹn vwọ kẹ.
A da yonr'irhi r'Ọghẹnẹ
 V'ẹwẹn r'avwanr'eje,
Ke che ru'ohọre r'Ọghẹnẹ
 Je mr'ebruba rọyen.
3. E je vw'utuoma r'umwemwu,
 Vw'ẹguonọ r'erhuvwu.
Se Baibol na kẹdi kẹdẹ,
 Je kọn phiy'udu wẹn.
Jihov'Ọghẹnẹ vw'ẹguonọ
 R'ihwo rọy'ejobi.
E gbe ja vwẹrosu'Ọghẹnẹ
 Je vw'ẹga kẹ bẹdẹ.

1. Oghẹnẹ mẹ, Romevwẹgba,
 Mi nyupho wẹn, ji vw'ẹguonọ wẹn.
 Me cha ga wẹ v'ẹgba m'ẹje,
 Mi che jir'uwe v'ẹwẹn m'ẹje.
 Me cha nabọ yonr'irhi w'ẹje,
 Mi che ru'obo wọ tar'ẹje.

(EKUO)

*Jihova, wẹwẹ yin muwan;
 Me cha ga wẹ v'ubiudu m'ẹje.*

2. Iruo w'ejobi jir'uwe.
 Emama na vw'urinrin kẹ wẹ.
 Biko vw'ukẹcha vwọ kẹ vwẹ
 Mi se vwo ghwoghw'ode wẹn k'ihwo.
 Me vwomavwọkpahoto kẹ wẹ;
 Me cha nabọ fuevun kẹ wẹ.

(Ekuo)

1. O vw'oboresorọ Jihova vwọ jẹ wẹ,
 O si we n'ebri vwọ rhi'urhukpẹ na.
 Vw'ubiudu wẹn, ọ mrẹ ọdavwẹ wo vwori
 Wọ vwọ guṇọ ru'obo ri yovwirin.
 Wo ve kẹ nu wo ru'ọhọre rọyen.
 Ọ cha vw'ukẹcha kẹ w'ọkineje.

(EKUO)

*Ọghẹnẹ dẹ wẹ reyọ
 V'ọbara ri Jesu.
 Ọ cha kẹ w'ogangan,
 ọ je cha bọn wẹ gan.
 Ọ cha vwẹrote we,
 je sẹro wẹ ọkieje.
 Ọ cha kẹ w'ogangan,
 ọ je cha bọn wẹ gan.*

2. Jihova ji'omọ rọyen no rhi ghwu kẹ wẹ,
 Ọna djephia nọ guṇ'erhuvwu wẹn.
 O de siobon'omọ rọyen no ghwu kẹ wẹ,
 J'omuwerọ nọ je cha bọn wẹ gan.
 Ọ karophiy'ẹguṇọ wo djephia.
 Ọ cha vwẹrot'ihwo rọy'ejobi.

(Ekuo)

*Vwo Omamọ Ode
Vwe Ero re Oghene*
(Aghwoghwo 7:1)

1. Avwanre guṣọ Vw'akpeyer'avwanre
Vwo vw'omam'ode Vw'obaro r'Oghene.
Je nen'irhi royen, Je ru'ohore royen.
Oma r'avwanre Kọ cha vwerhọn.
2. E ja guṣọ'ode Vwevunr'akpo na re,
E ja kẹnoma K'ojevwe r'akpo na.
Avwanre v'akpo na De vw'oyerinkugbe,
Ka cha di'ovweghren Ri Jihova.
3. Biko Jihova, Karophiy'avwanre.
Si'ode r'avwanre Phiy'obe r'arho na.
Avwanre cha ga we, Vw'ujiri vwọ kẹ we,
Ji vw'omam'ode Bẹdi bẹde.

1. Ono y'Oghene wẹn?

Ono wọ cha vw'ẹga kẹ?
 Ohwo wọ reyọ vwo ru'onini,
 Oy'Oghene wọ vw'ẹga kẹ.
 Wọ me nabọ rịen nẹ
 Wọ sa g'inin'ive rẹ.
 Gbe brorhien r'ohwo wọ cha vw'ẹga kẹ,
 Rọ je cha di'onini wẹn.

2. Ono y'Oghene wẹn?

Wẹwẹ yin che brorhien na.
 Oghene r'uyota wọ cha ga,
 Gban'orefian yu wọ cha ga?
 O ji vw'ihwo buebun
 Ri vw'usuon vwo ru'Oghene.
 Gba vw'ẹga vwo k'Oghene r'uyota,
 Wo ji ru'ohore royen.

3. Ono y'Oghene mẹ?

Jihova y'Oghene mẹ.
 Me cha vw'ujiri k'Oghene mẹ,
 Me cha yonr'irhi roy'eje.
 Oyen tan vwe hirhe
 Womar'ughwu ri Jesu.
 Me cha vw'ẹga kẹ v'ubiudu m'eje,
 Ji muoghọ k'ode royen.

1. Ny'ẹrhovwo mẹ Jihov'Ọghẹnẹ,
Wẹ y'Ọsẹ mẹ, Owẹ yen me ga,
Ode wẹn yen ma rho kparobọ.

(Ekuo)

Biko Jihova, ny'ẹrhovwo mẹ.

2. Wẹ kobiruo wọ vwọ kẹ vw'arhọ,
Me je vwọ mr'uyota na vughe,
Ẹguonọ wẹn vw'aghoghọ kẹ vwe.

(Ekuo)

3. Me ghene guonọ ru'ohore wẹn!
Kẹ vw'ukẹcha me sa vwọ ga wẹ.
Kẹ vw'ogangan mi vwo chirakon.

(Ekuo)

42 *Erhovwo rẹ Odibo rẹ Ọghẹnẹ* (Efesos 6:18)

1. Jihova, wẹ y'Ọghẹnẹ r'avwanre.
 Avwanre che muọghọ vwọ k'ode wẹn na.
 Wẹ yin ru'obo wọ guọnọ ru'eje.
 Jihov'Ọghẹnẹ, j'Uvie wẹn na rhe.
 Biko j'Uvie wẹn na rhe,
 Ọ cha ghw'ebruba vwọ rhe.
2. Wẹ kobiruo vwọ k'eburphiyo wẹn.
 Wo dj'ẹguonọ v'arodonvwẹ k'avwanre.
 Wọ vw'arhọ v'Ota wẹn k'avwanre.
 Wọ vw'aghwanre v'erianriẹn k'avwanre.
 Avwanre cha kpẹvw'owẹ,
 Ji sune vwo jir'uwe.
3. Avwanre de rhiẹromr'ukpokpogho,
 V'ubiudu'eje, avwanre vweros'owẹ.
 Wẹ yin che mu'oghwa na k'avwanre.
 Biko vw'ukẹcha v'ẹgba k'avwanre.
 Vw'ukẹcha vwọ k'avwanre
 Vwo ru'ohọre wẹn bẹdẹ.

1. Jihov'Ọghẹnẹ, avwanre kpẹv'owẹ.
Biko kerhọ r'ẹrhovwo r'avwanre.
Wẹwẹ y'Ọghẹnẹ r'avwanre vweroso,
Wẹ yen je nabọ vwerot'avwanre.
Avwanr'ejobi, e riabe r'umwemwu.
Biko gba vw'ayen vwo ghovw'avwanre.
Womari Jesu wọ t'avwanre hirhe.
Wọ nabọ riẹn n'avwanre gbare rẹ.
2. Wẹwẹ kobiruo fikir'ẹguonọ wẹn.
Wọ ch'avwanr'uko vwọ mrẹ wẹ vughe.
Biko Jihova, vw'ukẹcha k'avwanre
Vwọ vw'ẹga kẹ wẹ ji fuevun kẹ wẹ.
Wẹ kobiruo fikir'ẹw'ọfuanfon wẹn,
Wẹ kobiruo vwọ k'uphẹn r'aghwoghwo.
E j'avwanre ga wẹ v'omavwerhovwẹn.
Biko gbe ny'ẹrhovwo r'avwanre na.

44 Erhovwo rẹ Ohwo ro Muomaphiyọ

(Une Rẹ Ejiro 4:1)

1. Jihova wẹ mi kperi se:

“Biko ny’erhovwo mẹ.”

Oghwa na hohọ nọ kẹ vwe,
ewen mẹ hra toto.

Ukpokpogho mi rhiromrẹ
e nẹh’ofu dje vwe.

Jihov’Oghenẹ mẹ biko
me guon’ukẹcha wẹn.

(EKUO)

Kẹ vw’ukẹcha vwo chirakon.

Je chonvwuko vwọ yonre gan.

Vwevunr’oja, Mi de se we.

Oghenẹ mẹ, ny’erhovwo mẹ.

2. Okieje y’Ota wẹn vwọ kẹ
vw’uchebro v’obongan.

Me guonọ t’odavwẹ mẹ phia
j’eta na bẹn vwe ta.

Biko kẹ vw’esegbuyota,
me vwọ vweros’owẹ.

Chonvwuko vwọ rien n’eguonọ wẹn
rho n’ubiudu mẹ.

(Ekuo)

1. Biko Jihova chọnvwuko,
Rere iroro r'udu mẹ,
I vwo shephiy'ohọre wẹn.
Mi se vwo vw'esegbuyota.
Ubiudu mẹ da hra toto,
Ẹnwan da je djẹ vw'ovwerhẹn,
Ki mi che roro kpah'owẹ
V'erọnvw'eje ri yovwirin.
2. Erọnvw'ejobi ri vw'oghọ,
Ri f'ujiri, je di'uyota;
Eyen mi che roro kpahen,
Ufuoma vwọ di'ubiudu mẹ.
Jihova wẹ yen me cha ga.
A mrẹ vwo dj'aghwanre wẹn rẹ!
Mi che roro kpah'eta wẹn,
E vwọ nabọ t'ubiudu mẹ.

46 *Avwanre Kpẹvwẹ Owẹ, Jihova* (1 Tẹsalonaika 5:18)

1. Jihov'Ọghẹnẹ, avwanre kpẹvw'owẹ,
 Wọ vwọ k'avwanre urhukpẹ wẹn na.
 Wẹwẹ kobiruo vwọ k'uphẹn r'ẹrhovwo.
 Ka sa t'ọdavwẹ r'avwanre kẹ wẹ.
2. Wẹwẹ kobiruo, wo siobon'Omọ wẹn.
 Ọ fuevun t'oba, ji phikparobọ.
 Wẹwẹ kobiruo, wọ k'avwanr'Ota wẹn,
 Rọ ch'avwanr'uko vwo ru'ohọre wẹn.
3. Wẹwẹ kobiruo vwọ k'uphẹn r'aghwoghwo.
 R'avwanre vwo ghwoghwo'ode wẹn k'ihwo.
 Wẹwẹ kobiruo, wo che si'ojaeriọ no.
 Ebruba r'Uvie wẹn cha dia bẹdẹ.

47 *Nɛrhovwo kɛ Jihova Kɛdɛ Kɛdɛ* (1 Tɛsalonaika 5:17)

1. E ja nɛrhovwo vwɔ ki Jihova.
 O che ny'ɛrhovwo r'avwanr'ejobi.
 T'ɔdavwɛ wɛn vwɔ kɛ ker'ugbeyan.
 Vwɛrosu'Ọghɛnɛ v'ubiudu w'eje.
 Nɛrhovwo ki Jihova.
2. E ja nɛrhovwo vwɔ ki Jihova,
 Ja kpɛvwɛ fikir'arhɔ r'avwanre.
 Ja vu'Ọghɛnɛ no vwo ghovw'avwanre.
 Ọ nabɔ riɛn n'avwanre gbare rɛ.
 Nɛrhovwo ki Jihova.
3. E ja nɛrhovwo vw'ɔke r'ebɛnbɛn.
 Jihov'Ọghɛnɛ che bich'avwanre.
 Ja guɔn'ukɛcha rɔyen ɔkieje.
 E j'avwanr'ejobi vwɛrovwɔsuɔ.
 Nɛrhovwo ki Jihova.

1. E j'avwanre vwomakpotọ
Yan nen'Ọghenẹ kẹdi kẹde.
O dj'ẹguṇọ v'arodṇvwẹ
Wọ k'ihwo re yṇr'irhi rọyen!
Jihova cha ch'avwanr'uko,
A wọ nabọ yan nene.
Avwanre vwomakpahotọ
Re vwo ru'ọhọre r'Ọghenẹ.
2. Oba r'akpọ na kẹrire,
Ophu je nabọ mu'ldẹbono.
Ihwo reyọ vwṇsu'avwanre,
E je nẹrh'oshọ ji mu'avwanre.
Jihova che bich'avwanre,
O che mudia k'avwanre.
J'avwanre vw'ẹga k'Ọghenẹ.
Vw'ẹguṇọ rọyen ọkieje.
3. 'Ghenẹ vw'ukẹcha k'avwanre,
Womar'Ota v'ukoko rọyen,
Ọ vw'ẹw'ọfuanfon k'avwanre,
Ọ je nabọ kerhọ k'avwanre.
A da yan neni Jihova,
Ke se ru'ọhọre rọyen.
E j'avwanre vwomakpotọ
Yan nen'Ọghenẹ ọkieje.

49 *Ru Ubiudu rẹ Jihova Ghoghọ* (Isẹ 27:11)

1. Avwanre cha vw'ẹga kẹ wẹ,
 Jihov'Ọghenẹ r'avwanre.
Avwanre che ru'ọhọre wẹn,
 Je ghw'aghoghọ rhi'ubiudu wẹn.
2. Odibo wẹn rọ fuevun na
 Nabọ ruiruo r'aghwoghwo na.
Ọ vw'Ota wẹn yon'avwanre,
 Ji vw'ukẹcha vwọ k'avwanre.
3. Vw'ẹw'ọfuanfon wẹn k'avwanre,
 Avwanre sa vwọ yonre gan,
Ji vw'ujiri vwọ k'ode wẹn.
 Avwanre cha ga wẹ bẹdẹ.

50 *Erhovwo re Omaevwọkpahoto* (Matiu 22:37)

1. J'ubiudu me vw'eguono
 R'aghwanre kugb'Ota wen.
 Me cha nabọ vw'upho me
 Suine vwo jir'Ovie me.
2. J'awọ me kugb'abọ me
 Ru'obo re ke w'aghoghọ.
 Me cha vw'ẹgba v'oma me
 Vwọ kpahoto k'ẹga wen.
3. Chonvwuko, Oghene me,
 Mi se vwo ru'ọhore wen.
 Biko ju vwe nyeme we,
 Me vwọ ga we bevwede.

51 Avwanre Vwomakpahoto kẹ Ọghẹnẹ!

(Matiu 16:24)

1. Jihova yin si'avwanre vwo bri Jesu rhe,
Avwanre vwọ di'idibo ọyen.
Jihova yen k'avwanre
Eta re vw'arhọ k'ohwo.
E je vw'esegbuyota.
E ja fuevun g'Ọghẹnẹ.

(EKUO)

*Avwanre vwomakpahoto vwọ k'Ọghẹnẹ.
E che vw'ebruba v'arhọ ri bẹdẹ.*

2. Jihova y'avwanre vwomakpahoto kẹ.
Avwanre cha vw'ẹga kẹ bẹdẹ.
Ọ kohw'omavwerhovwẹn
Ra vwọ di'iseri ọyen,
Re vwo ghwoghw'Uvie ọyen.
E je ghwoghwo k'ihw'eje.

(Ekuo)

52 *Omaẹvwọkpahoto ẹ Inenikristi*

(Hibru 10:7, 9)

1. Jihova yen m'eronvw'eje;
 Odjuvwu v'akpo na,
 Isio, onre v'emeranvwe;
 Iruo r'obọ royen.
 Oyen je vw'arhọ k'avwanre.
 Iruo royen djephia
 N'oy'ovo yen muwan r'ujiri
 V'ẹga r'avwanr'ejobi.
2. Jesu vwọ rhi'otorakpo na,
 O bromaphiyame.
 O veri no che ru'ohọre
 Ri Jihov'Oghẹne.
 O vwo bromaphiyame nu,
 'Ghẹne da jẹreyọ,
 O je nẹhovwo vwọ k'Oghẹne:
 'E j'ohọre wẹn rugba.'
3. 'Vwanre bruwerhe Jihova,
 E vwo jir'ode wẹn.
 Avwanre vwomakpahoto,
 V'ewẹn r'avwanr'eje.
 Wo siobon'Omo wẹn vuovo
 No rhi ghwu k'avwanre.
 Vw'akpeyeren r'avwanr'ejobi
 Wewẹ y'avwanre cha ga.

53 *Re Vwo Muegbe rẹ Aghwoghwo* (Jerimaya 1:17)

1. Urhiọke

E vwo muegbe,
Re vwo kp'iruo r'aghwoghwo.
Osio bi phiyo,
Ọ da tu'ẹrhọ phiyo.
Ọna se mu'ohwo chidi'uwevwin,
je vwerhen.

(EKUO)

*Muegbe r'ẹwen wen, je nẹhovwo,
Re vwo phikparobọ;
Avwanre che vw'ẹgba v'oruru
Ra guọnọre.
Emekashe je ch'avwanr'uko,
Jesu yin su'ay'eje.
Ọrivẹ ra v'ọyen gbe ghwoghwo
Biẹch'avwanre.*

2. Aghoghọ

Ọy'a cha mrẹ,

E de phi'enana y'ewen.

Jihova je mrẹ

Ẹgbaẹdavwọn r'ohwo,

Ọ nabọ karophiy'ẹguonọ

re djephia.

(Ekuo)

1. Idjerh'ọvo herọ,
 Idjerhe r'ufuoma.
 Ọn'idjerhe r'Ọghẹne
 Wo yono kpahen,
 Ọn'idjerhe ri
 Jesu Kristi yon'uwe.
 Ibaibol na sere
 n'idjerhe r'ufuoma.

(EKUO)

*Ọnana yen idjerhe r'arhọ na.
 Di'evun rọyen, wo ji n'akọkọ rẹ.
 Ọghẹne n'idjerhe na, ọna;
 Wo n'uko rẹ, idjerhe na, ọna.*

2. Idjerh'ọvo herọ,
 Idjerhe r'ẹguọno.
 Jihova yen dj'idjerhe
 Nana k'avwanre.
 Eguọno rọyen vọnre
 V'omavwerhovwẹn.
 Vwọr'uyota,
 Ọnan'idjerhe r'ẹguọno.

(Ekuo)

3. Idjerh'ovo herọ,
Idjerhe r'arhọ na.
Jihova tan'idjerhe
Nana me yovwin.
Ọnan'idjerhe r'ufuoma
Kugb'ẹguonọ.
Kpẹvw'Ọghẹnẹ,
Fikir'idjerhe r'arhọ na.

(*Ekuo*)

1. Vwan yanran re ghwoghw'Uvie na
 Wọ k'ihworakpọ n'eje.
 Vwan djoshọ r'ivwighrẹn rẹ,
 We ghwoghwo vwọ k'ihw'eje.
 Gbe ghwoghwo ni Jesu suẹn re,
 Ọ dj'Eshu rhi'akpọ na re.
 O che mu'Eshu phiy'uwodi,
 Oma ko che fu'ihw'eje.

(EKUO)

*Emọ mẹ, Ovwan djoshọ rẹ,
 Dede n'ayen vwọsu'ovwan.
 Me cha sẹro r'idibo mẹ,
 Me cha vwẹrovwot'ayen.*

2. Ivwighrẹn na de bun dede,
 Wọ je djoshọ rayen rẹ,
 Ayen da je vwọsu'ovwan,
 Je rey'ovwan vwọ jehwẹ.
 Idibo mẹ, we mudia gan,
 Omukpahen je cha rhe.
 Me cha vwẹrovwot'ihwo mẹ,
 Ayen che phikparobọ.

(Ekuo)

3. Me cha karophiy'iruo wẹn,
Mẹ y'ẹgba v'ekpofia wẹn.
Ayen da tobọ hwe we,
Ihwo ri ghwuru che vřen.
Wọ djoshọ r'ihworakpọ rẹ,
E cha sa kẹ w'arhọ rẹ.
Wọ da sẹro r'oyonregan,
Ku wo vw'arhọ ri bẹdẹ!

(*Ekua*)

56 *Ru Uyota na Phiyọ Ọromobọ Wẹn*

(Isẹ 3:1, 2)

1. Vw'ubiudu w'eje vwọ gi Jihov'Ọghẹnẹ.

A cha sa g'Ọghẹnẹ kẹ wẹ rẹ.

Gbe nen'uchebro ri Jihova vwọ kẹ wẹ,

S'ota r'Ọghẹnẹ gbuyota.

(Ekuo)

Gbe r'uyota na,

Ọ vwọ di'ọromobọ wẹn.

Wọ cha mr'ebruphiyọ

ri Jihova,

Uyota na da di'owẹn.

2. Ẹgbaẹdavwọn wẹn kugb'ọke ru wọ ghwọrọ

Vwevunr'iruo r'ẹga r'Ọghẹnẹ

Cha ghw'ebruba rhe, kugb'arhọ ri bẹvwẹdẹ

Rọ cha kẹ w'omavwerhovwẹn.

(Ekuo)

3. Avwanr'ejobi imitete k'Ọghẹnẹ.

E je nen'odjekẹ rọy'eje.

A da vw'ọkieje vwo ru'ọhọre r'Ọghẹnẹ,

Ka cha mr'ebruba v'aghoghọ.

(Ekuo)

1. Avwanre vwẹrokeri Jihova

Vwo vw'ẹguonọ r'ihworakpọ n'ẹje.
 Ọ guonọ n'ihw'ejobi vw'usivwin,
 O rhiabọ royen vwọ k'ihw'ejobi.

(EKUO)

*Ubiudu na ma ghanre,
 Ọ di'opharo rayen rẹ.
 Ghwoghwota r'Ọghẹnẹ k'ihw'ejobi.
 Ẹguonọ yen mu'avwanre
 Vwo ghwoghwota vwọ k'ayen,
 Ihw'ẹje vwọ di'ugbeyan r'Ọghẹnẹ.*

2. Otor'asan ra da mr'ihwo na rẹ,

V'oka r'uruemu r'ayen djephia rẹ.
 Ubiudu na y'obo re ma ghanre,
 Ọnana yin Jihova tẹnrovi.

(Ekuo)

3. Jihova vw'ẹguonọ r'ihw'ejobi

Re kẹnoma k'uruemu r'akpọ na.
 Ja davwengba vwo dj'ọnana k'ihwo.
 Je ghwoghwota na vwọ k'ihwo n'ẹje.

(Ekuo)

1. Jesu vu'avwanre ne ghwoghwota na.

O ghwoghwota ri Jihova,

Vw'oke r'uvo kugb'oke'osio.

O nabọ guṇ'idibo r'Ọghẹ.

Vwo n'urhiọke re t'ovwṇvwṇ

vw'ẹkuoto n'eje.

Avwanre ghwoghwota k'ihwo

Vwo n'uwevwin vwo kp'uwevwin,

N'Ọghẹ che si'ebẹnbẹn r'akpo na no.

(EKUO)

Vw'akpọneje,

E ja guṇ'igbeyan r'ufuoma,

Guṇ'ihw'eje

Ri vw'ubiudu v'ẹwẹn r'usivwin,

Ghwoghwota na

K'ihw'ejobi.

2. Ọke herọ rẹ, e je brokpakpa.
Ihwo buebun guọn'usivwin,
Ja davwengba vwo sivw'ihwo.
Eguonọ yen mu'avwanre vwo ghwoghwo.
Ja vw'ukẹcha vwọ k'ihw'eje
r'ofu r'akpọ dje.
Avwanre hi'ẹkuotọ n'eje,
Ohwo da kerhọ r'avwanre,
Oma nabọ vwerh'avwanre ọkieje.

(*Ekuo*)

1. We nen'uvwe

Jir'Ọghẹnẹ!

Ọyen vw'erọnvw'ejobi k'avwanre.

T'ason t'uvo,

E che jiro

Fikir'ẹguọno kugb'ẹgba ọyen.

E ja sune vwo jir'ode ọyen.

2. We nen'uvwe

Jir'Ọghẹnẹ!

O che ru'odavwe r'avwanr'ejobi.

Ọ cha vw'ẹgba

V'ew'ofuanfon

Vwo k'ihwo re guon'ukẹcha ọyen.

E je ghwohw'ode ọyen vwo k'ihwo.

3. Gbe nen'uvwe

Jir'Ọghẹnẹ!

E j'avwanre nabọ vwẹrovwọsuọ.

Ọ vw'ukẹcha

Vwo k'avwanre.

Uvie ọyen cha ghw'ebruphiyo rhe.

E j'avwanre sune r'ujiri kẹ.

1. On'ukpe r'aghoghò
 r'Ọghẹnẹ, e je ghwoghwo,
 N'ẹdẹ r'ophu royen na cha rhe,
 o totọ re.

(Ekuo)

*Ovụẹ nana, che sivw'ayen;
 O ji che sivw'avwanre.
 Ayen de nyo, k'ayen vw'arhọ,
 E je ghwoghwo vwọ k'akpọje;
 Je ghwoghwo.*

2. O vw'ovụẹ r'avwanre
 che ghwoghwo vwọ ru'akpọje.
 E je durh'ihwo rhe
 vwọ di'ugbeyan r'Ọghẹnẹ.

(Ekuo)

(URHIẸ)

*Ovụẹ na, ọ v'okpakpa.
 Ihwo de nyo, k'ayen vw'arhọ.
 Ja vu'ayen, je yon'ayen
 Uyota rọ cha k'ay'arhọ.*

(Ekuo)

1. Ihwo r'Ọghẹnẹ, vwan nabọ mudia gan,
Avwanre yerẹn vwevunr'ọke r'oba na.
Dede n'Eshu muẹ kpah'avwanre,
Jihova cha ch'avwanr'uko yonre gan.

(EKUO)

Ja yan phiaro, Iseri, V'uduefiogbere!
Ghọghọ n'ovwan ji vwobọ vw'iruo r'Ọghẹnẹ!
Ghwoghwo k'ihw'eje paradaisi kẹrire.
Ebruba r'Uvie na je kẹrire.

2. Avwanre cha guon'ojevwe r'akpọ rẹ,
Avwanre je cha guon'ujiri r'akpọ rẹ.
E gbe ja kẹnoma k'akpọ na,
E ja sẹro r'oyonregan r'avwanre.

(Ekuo)

3. Ihwo vw'Ọghẹnẹ v'Uvie na vwọ jehwẹ.
Evo tobọ rey'ode rọyen vwọ heha.
E j'avwanre ru'ode rọyen fon,
Ji ghwoghwo phia vwevunr'akpọ n'ejobi.

(Ekuo)

1. Sune v'aghoghọ, Sune r'ujiri k'Ọghẹnẹ.
 Ghwoghwh'iruo rọy'eje V'obo ro ji che ru.
 Jiri Jihova, Ọghẹnẹ r'ophikparobọ.
 Vw'ẹdjoeguo rọy'eje,
 O brorhiẹn r'ọvwata.

*(EKUO)**Ja sune!**Ja sune kpokpọ na!**Ja sune!**Sune jir'Ọghẹnẹ.*

2. Sune r'aghoghọ Vwọ ki Jihova Ọghẹnẹ.
 Je tit'odẹ rọyen Womar'une nana.
 Je kuomakugbe Sune r'ujiri k'Ọghẹnẹ.
 Vw'ekuakua r'uhworo
 Vwọba sune jiro.

(Ekuo)

3. Gbe j'abadi na V'emama n'ejobi jiro.
 E ja vwomab'ayen Vwo kuvwie k'Ọghẹnẹ.
 Gbe j'igbenu na Kugb'etọ na sune jiro.
 Abadi v'urhie na
 Tey'abọ k'Ọghẹnẹ.

(Ekuo)

1. Ihw'evo ri'Ọghẹnẹ rẹ,
 K'ayen vw'ẹga vwọ k'ema.
 Jihova y'Ọghẹnẹ
 Rọ m'erọnvw'eje.
 Eghẹnẹ r'efian nana
 Ri'obo r'odẹ cha dia rẹ.
 Ihwo re vw'ẹga k'eghẹnẹ na,
 E cha mr'ebruba vuọvo rẹ.

(EKUO)

*'Vwanr'iseri Jihova.
 E je ghwoghw'odẹ rọyen.
 Jihova y'Ọghẹnẹ r'uyota,
 Eta rọy'eje ruẹgba.*

2. E gbe je fiudugberi
 Vwo ghwoghw'Uvie r'Ọghẹnẹ
 Kugb'urinrin rọyen;
 E ja vu'ihw'eje.
 E ja vw'ukẹcha k'ihwo
 Vwọ mr'uyota na vughe,
 K'ayen je cha sune r'aghọghọ,
 Une r'ujiri k'Ọghẹnẹ.

(Ekuo)

3. Je tit'ode r'Oghene,
E ja vw'ujiri vwọ ke.
E je ghwoghwota na
Vwọ ru'akponeje.
Ihwo de kuoborherie,
O ji che vwo ghovw'ayen.
Oghene cha k'avwanr'aghoghọ,
Ufuoma v'arhọ ri bede.

(*Ekua*)

1. Avwanre yerẹn vw'ọke r'oba,
 Ọnana y'ọke r'orhọ na.
 Ekankon n'ejobi vware ku,
 E gbe je vwobọ vw'orhọ na.
 Jesu Kristi yin che su'avwanre
 Vwevunr'iruo r'orhọ nana.
 Ọ vw'omavwerhovwẹn vwọ k'avwanre,
 Re vwo vwobọ vw'iruo nana.

2. Ẹguṇọ r'Ọghẹnẹ v'ihw'efa
 Mu'avwanre vwo ghwohgwota na.
 Oba r'akpọ na sikẹri re,
 E je brokpakpa ruiruo na.
 Jihova che bruba k'avwanre,
 Ọ cha vw'aghọghọ k'avwanre.
 E gbe j'avwanre yonre gan t'oba,
 E se vwo vw'arhọ ri bẹdẹ.

1. Yan phiaro, yan phiaro, yerin vwo tedje!
Gbe j'urhukpe wen lo vwọ k'ihworakpo n'eje.
Davwengba vwevunr'iruo r'aghwoghwo na,
Je vwerovwosu'Oghene.
Jesu yin vw'iruo na k'avwanre,
O je nabọ vwobọ vw'iruo na.
Gba vwerosu'Oghene no che bicha wẹ.
Davwengba vwọ yonre gan.
2. Yan phiaro, yan phiaro, ji fiudugberi!
Ghwoghwota r'Oghene vwọ k'ihwo r'akponeje.
Vw'ujiri k'Oghene, Ovie r'avwanre,
Wo vwo ruiruo royen na.
Iwighren de mu kpah'avwanre,
A cha je yanran ra vu'ihwo na.
Gbe je ghwoghwo n'Uvie na sikeri re,
Vw'uyota na yon'ihwo.

3. Yan phiaro, yan phiaro, re yon'ihwo na,
Ru'ona r'uyono wẹn, o se vwo yovwinphiyo.
Ẹw'ọfuanfon na cha vw'ukẹcha kẹ wẹ.
Wọ cha mr'omavwerhovwẹn.
Vw'ẹguonọ r'ihwo wo yono na
Ji rhivwin br'ayen ra ọkieje.
A da vw'ukẹcha k'ayen vwọ g'Ọghẹnẹ,
K'ayen je cha yonre gan.

1. E si'uyota r'Uvie na nu vw'ọke grongron.
 E de rhi dj'uyota na phia vw'ọke nana.
 Jihova tare no che si'ojaeriọ n'akpọ,
 Ọy'Ọghẹnẹ r'arodonvwẹ kugb'eguonọ.
 Jihova br'ẹdẹ rọ cha vwọ vw'Uvie na mu.
 O veri ni Jesu Kristi che su'akpọneje.
 Ọ je san'ihwo ri che neni Jesu sun.
 Usuon rayen cha ghw'ebruba vwo rh'ihw'eje.

2. Avwanre ghwoghwota r'Ọghẹnẹ vwọ k'ihwo.
 Jihova guonọ ne ruiruo r'aghwoghwo na.
 Ọ vw'emekashe rọyen vwọ ch'avwanr'uko
 Vwo ruiruo r'aghwoghwo nana vw'akpọneje.
 E gbe j'avwanre vw'ujiri vwọ k'Ọghẹnẹ.
 J'avwanre davwẹngba
 vwo ru'odẹ rọyen fuanfon.
 Avwanr'Iseri r'Ọghẹnẹ vw'akpọneje,
 E je ghwoghw'Uvie r'Ọghẹnẹ k'ihwo n'eje.

1. Ọghẹnẹ j’urhi k’avwanre,
 E gbe j’avwanre yonr’urhi nana.
 Ọ vu’avwanr’ejobi ne muegbe
 Vwo ghwoghwo’Uvie na vwọ k’ihw’ejobi.

(EKUO)

*Gbe je ghwoghwo
 Vwọ k’ihwo r’akpọneje.
 Je ghwoghwo,
 Oba na sikẹri re.
 Je ghwoghwo,
 Vw’ukẹcha vwọ k’ihw’eje.
 Je ghwoghwo
 Vwọ ru’akpọeje.*

2. Ebẹnbẹn se t’avwanre’oma.
 Omukpahen sa ghw’omavovwẹ rhe.
 Edavwini de t’avwanre’oma,
 Avwanre cha vwẹrosui Jihova.

(Ekuo)

3. E je ruiruo na v’aghoghọ,
 E ja davwẹngba vwo yon’ihwo na.
 E gbe je ghwoghwo’ovuẹ r’Uvie na,
 J’avwanre ru’odẹ ri Jihova fon.

(Ekuo)

1. Je vwobọ vw'iruo r'aghwoghwo na,
Iruo ri Jesu k'avwanre.
Ọ cha vw'ukẹcha vwọ k'avwanre,
Ọ cha nabọ yon'avwanre.
Ihwo da kerhọ r'Ota r'Uvie na,
Ọ cha nẹh'ayen vw'ebruba.
Gba davwengba wẹn vwo vwobọ vw'iruo na,
Iruo ri Jesu vwọ k'avwanre.
2. Gba nabọ muomaphiy'iruo na,
Wọ da guọnọ phikparobọ.
J'avwanre vw'ukẹcha vwọ k'ihwo
Vwo vw'ẹruọ r'Ota r'Ọghẹnẹ.
Vw'ukẹcha k'ayen vwo phikparobọ,
Edavwini de t'ay'oma.
Ota r'Uvie na de t'ubiudu r'ihwo
Ku wọ cha mr'aghoghọ ọkieje.

1. E ja yanran re ghwoghwo'Uvie na
 K'ihworakpo n'ejobi.
 E ja vw'ukęcha vwọ k'ihw'eje,
 Je dj'ęguonọ vwọ k'ayen.
 J'avwanre tit'ęga r'Ọghenę,
 Je ghwoghwo k'ihwo v'aghoghọ.
 Ja yanran re ghwoghwo ọkieje,
 Je dj'ode r'Ọghenę k'ihwo.

(EKUO)

*Yanran, fiudugberi ghwoghwo'Uvie na
 vwọ ru'akponeje.*

*Yanran, fuevun ki Jihov'Ọghenę,
 vwomakpotọ kẹ.*

2. E ra jẹreyọ v'igod'efa,
 Vwobọ vw'iruo r'aghwoghwo.
 Avwanr'eje vw'ęga k'Ọghenę,
 T'imitete t'ekpako.
 Aghwoghwo r'Uvie ri Jihova,
 E ja vu'ihw'ejobi kpahon.
 A cha mr'ukęcha ri Jihova;
 E je fiudugberi ghwoghwo!

(Ekuo)

1. Jesu dj'obo re che ghwohwota na wan
Vwọ k'ihworakpọ n'ejobi:
'Ihwo re guṇọ di'ugbeyan r'Ọghẹ,
Eyen che ghwohwota na vwọ kẹ.
Gba nabọ yer'ohwo ro vw'uwevwin na,
Ọ da kerhọ ko che vw'ufuoma.
Wọ da je mr'ohwo rọ rhonvwe kerhọ rẹ.
Kpogh'ekpen n'awọ wẹn, wọ yanran.'
2. Ihwo re rhiabọrey'ovuẹ wo ghwohwota,
Jihova che bruba k'ayen.
Ayen da nabọ ru'ohore r'Ọghẹ,
K'ayen che vw'arhọ ri bẹvwẹdẹ.
Wọ ru'ẹnwan r'obo wọ cha ta k'ayen rẹ,
Jihova cha vw'ukẹcha kẹ wẹ.
Eta wẹn da nabọ t'ubiudu r'ihwo,
Ọ cha nẹh'ayen rhe g'Ọghẹ.

1. Avwanr'eje isodje,
 Jesu su'avwanre.
 Eshu da vwosu'avwanre,
 E ji che mudia gan.
 Avwanre cha yonre gan,
 Ji ghwoghwota na.
 Osho mu'avwanre rẹ,
 Je fiudugberi.

(EKUO)

*Avwanr'eje isodje;
 Jesu su'avwanre.
 Je ghwoghwo k'ihw'eje,
 "Uvie na suen re."*

2. Avwanr'ihwo r'Ọghẹnẹ
 Ri ghwoghwota na.
 Ja guon'igode royen
 Re hra nen'as'eje.
 Ghwor'oke vwo yon'ayen,
 Rhivwin br'ayen ra.
 J'avwanre durhi'ayen
 Vwo kp'Ọguan Ruvie.

(Ekuo)

3. Avwanr'eje isodje,
Jesu su'avwanre.
Muegbe herh'ofovwin na,
J'avwanre yonre gan.
E je gberophiyoto,
E je nomaso.
E gbe je mudia gan
Vw'oke r'ebenben.

(Ekuo)

1. Avwanre vwọ rhi'ukoko na,
Ke rhi vw'ẹruọ r'uyota na.
K'avwanre rhe ri'Ọghẹnẹ
V'eburuphiyọ r'Uvie rọyen.
E j'avwanre vwomakpotọ
Vwo ru'ọhọre ri Jihova.
Je ghwoghwo ọrho rọyen,
E ja vw'urinrin vwọ k'ode rọyen.
E je ghwoghwo vwọ k'ihw'eje,
E ja vu'ihwo r'akpọneje.
Ja vw'ukẹcha vwọ k'ihwo na.
Je yon'ayen uyota na.
Ja davwengba ọkineje
Vwo vwobọ vw'ẹga r'Ọghẹnẹ.
E gbe je ghwoghwota na
Tavwi Jihova ki phioba phiyọ.

1. Avwanre vwo ghwoghw'Uvie na,
 Kugb'od'ofuanfon wẹn na,
 Ihwo reyọ vwọsu'avwanre,
 Ayen muẹ kpah'avwanre.
 J'oshọ che mu'avwanre rẹ,
 Upho wẹn y'avwanre che nyo.
 Biko k'avwanre ẹw'ofuanfon;
 Biko nyẹrhovwo r'avwanre.

(EKUO)

Vw'uduefiogbere k'avwanre
Vwo ruiruo r'aghwoghwo na.
Vw'ẹgba v'ogangan k'avwanre
Vwo ruiruo r'Uvie wẹn na.
Amagidoni kẹrire.
Bẹsi'ẹdẹ rode na vwo te,
Biko gbe j'avwanr'ejobi
Fiudugberi.

2. Avwanre vw'emu vuovo re,
Wẹ y'Ọghẹnẹ r'avwanre.
Oshọ da tobọ mu'avwanre,
Avwanre vweros'owẹ.
Biko sẹro r'avwanre
Vwo n'abọ r'ihwo re vwosua.
Ch'avwanr'uko vwo ruiruo wẹn na,
Akponeje vwo ny'ode wẹn.

(Ekuo)

1. Ọnan'une, une r'ophikparobọ;
 Ọ vw'ejiro k'Ọromevwẹgba na.
 Eta rọyen vọnre v'iphiẹrophiyọ.
 Je kuomagbe vwọ sune r'Uvie na:

(EKUO)

*'Rhe g'Ọghẹnẹ Vw'urinrin kẹ.
 Jesu Ovie; Ghwoghwo k'ihwo!
 Yon'une na, ọnan'une r'Uvie na.
 Rhe g'Ọghẹnẹ, je jir'ode rọyen.'*

2. Ja vw'une na vwo ghwoghw'Uvie r'Ọghẹnẹ.
 Jesu Kristi che su'akpọ n'ejobi.
 A je mraro n'ihw'evo che nene sun.
 Ihwo nana; e ra jẹreyọ na.

(Ekuo)

3. Une nana, ihwo sa nabọ rien so.
 Ovụẹ rọyen k'ohw'omavwerhovwẹn.
 Vw'akpọneje, ihwo buebun sune na,
 K'ayen s'ihwo ne rhe vwomab'ayen:

(Ekuo)

1. Ihwo buebun hanrh’Ọghẹnẹ,
 Ayen ji miovw’ode ọyen.
 Evo ke tan’orumwemwu,
 Efa n’Ọghẹnẹ herọ rẹ.
 Ono che ru’ode ọyen fon?
 Ono cha suine vwo jiro?

(EKUO 1)

*“Ghẹnẹ mẹ na! Ji vwe, ji vwe!
 Me cha suine vwo jir’uwe.
 Me vwomakpahoto vwọ kẹ wẹ.
 Mẹvwe na! Ji vwe, ji vwe!”*

2. Ihwo djoshọ r’Ọghẹnẹ rẹ;
 K’ayen je tan’ogbegherẹ.
 Evo rey’ẹga vwọ k’ema,
 Efa vwi Siza ru’Ọghẹnẹ.
 Ono cha yanran ra vu’ayen,
 N’ẹdẹ rode na totọ re?

(EKUO 2)

*‘‘Ghẹnẹ mẹ na! Ji vwe, ji vwe!
Mi che fiudugberi vu’ayen.
Me vwomakpahoto vwọ kẹ wẹ.
Mẹvwẹ na! Ji vwe, ji vwe!’*

3. Ihw’evo brenu nonena,
Kidie umwemwu buenphiyo.
Ayen ke nabọ hiẹ guọno
Uyota rọ k’ohw’ufuoma.
Ono vw’uchebro vwọ k’ayen?
Ono cha vw’ukẹcha k’ayen?

(EKUO 3)

*‘‘Ghẹnẹ mẹ na! Ji vwe, ji vwe!
Me cha vw’ukẹcha vwọ k’ayen.
Me vwomakpahoto vwọ kẹ wẹ.
Mẹvwẹ na! Ji vwe, ji vwe!’*

1. Mavọ y'oma ru we
 wo de ruiruo r'aghwoghwo,
 Wọ da davwengba w'eje
 vwo ghwoghwota k'ohwo?
 Wo ru'ẹken wẹn nure;
 'Ghẹne che ru'ẹken rọyen.
 Ọ nabọ vugh'ihw'eje
 re guọno vw'ẹga kẹ.

(EKUO)

*Ọ nẹrhe vw'omavwerhovwẹn,
 a da vw'omakpahoto kẹ.
 E j'avwanre vw'ujiri kẹ
 rhirin bẹdi bẹde.*

2. Mavọ y'oma ru we
 ota wẹn de t'ubiudu
 R'ohwo rọ ghene guọno
 vw'arhọ ri bẹvwẹde?
 Evo davwerhọ rẹ,
 o vw'ihw'efa ra je phiẹn.
 Avwanre je mr'aghoghọ
 vw'iruo r'aghwoghwo na.

(Ekuo)

3. Mavọ y'oma ru we
 Ọghenẹ da chọnwuko,
Wọ sa vwọ nabọ ruiruo
 r'avwanr'ejobi ruẹ?
Fiudugberi ghwoghwo,
 je tota rọ vwerhoma,
Guon'ihwo ri vw'ewen na;
 oba na kẹrire.

(Ekuo)

1. Vw'akpọ na, akpọ r'ebri na,
Avwanre mr'urhukpẹ.
Elo na nẹrhe vw'aghoghọ,
E ja vu'ihwo kpahon.

(EKUO)

*E je ghwoghw'ovuẹ na,
Ovuẹ rọ vọnre v'elo
Kugb'iphiẹrophiyọ.
Ja vw'ukẹcha k'ihwo
E je vwọ mr'urhukpẹ na,
Vwo n'ebri na.*

2. Ja rhọvwon ihwo re vwerhen;
Oba na kẹrire.
Uchebro v'iphiẹrophiyọ,
Ọy'avwanre k'ihwo.

(Ekuo)

1. J'avwanre vw'Ota r'Oghẹnẹ
 Vwo yon'ihworakpo.
 Avwanre cha mr'ebruphiyo
 Kugb'omavwerhovwen.
 Jesu Kristi ji yon'ihwo,
 E ja vwẹrokere.
 E ja vw'ukẹcha vwọ k'ihwo vwo
 Sikẹri Jihova.
2. E ja yonr'irhi r'Oghẹnẹ
 Re vwo yon'ihwo na.
 Ihwo ke cha riẹn n'avwanre
 Idibo r'Oghẹnẹ.
 E gbe ja fuẹri Baibol na
 Ra vwọ ri'ovuẹ royen.
 Ka sa reyọ vwo yon'ihw'efa
 Kugb'oma r'avwanre.
3. Jihova che bich'avwanre
 Re vwo yon'ihwo na.
 Ja nẹhovwo vwọ k'ukẹcha,
 Ọ cha ch'avwanr'uko.
 Je vw'ẹguonọ r'Ota royen
 Kugb'ihwo re yono.
 Je yon'ayen rere ayen vwọ
 Nabọ yon'ihw'efa.

Yono Ayen, Ayen Vwo Mudia Gan

(Matiu 28:19, 20)

1. Eyono r'idibo r'Ọghẹnẹ
Vọnre v'omavwerhovwẹn.
Jihova yen vwẹrovwot'ayen
Vw'idjerhe r'uyota na.

(Ekuo)

*Jihova, nyẹrhovw'avwanre,
Wọ nabọ vwẹrovwot'ayen.
Jihova, biko gbe j'ayen phikparobọ.
J'ay'eje nabọ mudia gan.*

2. Ọkieje nẹrhovwo vwọ k'ayen,
Ayen sa vwọ yonregan.
Yon'ayen, ayen vwo mudia gan;
Ihwo re bruphiyọ kẹ.

(Ekuo)

3. J'ay'eje vwẹrovwọsu'Ọghẹnẹ,
Je vwẹrovwọsui Jesu.
Gbe j'ayen vw'ẹmienyo v'odirin,
Vw'onẹ r'arhọ ri bẹdẹ.

(Ekuo)

80 ‘Davwen Wọ Mre nẹ Jihova Yoma’ (Une Rẹ Ejoro 34:8)

1. Ẹga r’Ọghẹnẹ vwerhoma,
Avwanre niro ghanghanre.
E ja ghwọ’ọke vwo ghwohwota na.
E je ghwohwo vwọ k’ihw’eje.

(EKUO)

*Baibol na tare: ‘Davwen wọ mre
Tani Jihova yoma.’
Ẹga r’Ọghẹnẹ vọn v’erere.
Gba davwengba w’ejobi.*

2. Ihwo reh’ẹga r’ọkieje,
Ayen cha mr’ebruba buebun.
Ayen vwẹroso Jihov’Ọghẹnẹ
Nọ cha k’ayen eronvw’ejobi.

(Ekuo)

1. Urhiọke, wo de vřen, bẹsi'ọ̀nre na vwo lo,
 V'ovwerhẹn vw'ẹro wẹn,
 wo muegbe r'aghwoghwo, nẹrhovwo.
- Wọ me hwẹ vwọ k'ihwo wo che ghwoghwota kẹ.
 Evo cha kerhọ wẹ,
 efa yanjuwe vwo; vw'edirin.

(EKUO)

E ja gi Jihova;

Ọy'orhiẹn r'avwanre.

Obo rọ vu'avwanre yen che ru.

Chirakon vw'iruo na,

vw'ọke'uvo vw'ọke'osio.

Ka sa vu'Ọghẹnẹ: "Avwanre vw'ẹguọnọ wẹ."

2. Ovwonvwon r'ẹdẹ na, j'ọ̀nre na ruotọ re,
 Oma wẹn ghwor'owẹ,
 oma je vwerh'owẹ, nẹrhovwo.
- Vw'oma vwọ kpahotọ vwọ k'ẹga r'Ọghẹnẹ.
 J'akpẹwi Jihova
 vwọ k'ebruba rọyen ọkieje.

(Ekuo)

1. Jesu Kristi j'urhi
 Vwọ k'avwanr'eje:
 J'urhukpẹ r'avwanre
 Lo k'ihwo n'eje.
E je yon'ihwo na
 Ota r'Ọghẹnẹ,
 Ayen vwọ mr'urhukpẹ na,
 Je rhe g'Ọghẹnẹ.
2. E je ghwoghwo'Uvie na
 Vwọ k'ihwo n'eje.
 Ja vw'ota v'uruemu
 Vwo ghwoghwo k'ayen.
Ota r'Ọghẹnẹ na
 Pha ker'urhukpẹ.
E ja vw'ukecha k'ihwo,
 Ayen vwo vw'arhọ.
3. Omamọ r'uruemu
 Dj'urhukpẹ na phia.
E j'eta r'avwanre
 Je vọn v'avwerhen.
J'urhukpẹ r'avwanre
 Lo phia ọkieje,
 K'avwanre cha mr'ebruba
 Vw'iruo r'Ọghẹnẹ.

1. Vwo n’uwevwin vwo kp’uwevwin,
 E che ghwoghwota na.
 Vwo n’ẹkuoto vwo kp’ẹkuoto,
 E che yon’ihwo na.
 Jesu Kristi yen vu’avwanre
 Ne re ghwoghw’Uvie na.
 E j’emare v’imighene
 Ghwoghwo vwọ k’ihw’eje.

2. Vwo n’uwevwin vwo kp’uwevwin,
 E je ghwoghw’usivwin.
 Ihwo ri s’ode r’Oghene
 Iyin che vw’usivwin.
 E che se muoghọ vwọ k’ode
 r’Ohwo ra rienre ẹ.
 E je ghwoghw’ode r’Oghene
 Vwọ k’ihwo r’akpọje.

3. Gbe je n’uwevwin kp’uwevwin,
 Vwo ghwoghwota k’ihwo.
 T’ayen nyori yere senre,
 Ayen che brorhiẹn na.
 Je ghwoghw’ode ri Jihova
 Kugb’Uvie royen na.
 A cha mr’igode r’Oghene
 Womar’aghwoghwo na.

1. Jihova rien ọdavwẹ wẹn
 V'obo re cha kẹ w'aghoghọ.
 O dj'idjerhe buebun k'ohwo,
 Ra sa vwọ ga ọkineje.

(Ekuo)

*Davwengba w'ejobi,
 vwọ ki Jihova.
 A da guọn'ukẹcha, gbe muegbe
 wọ vw'ukẹcha phia.*

2. Iruo herọ vw'ẹkuot'eje.
 Kp'asan ra da guọn'ukẹcha
 Ọna djephia ne vw'ẹguọno.
 Ja vw'ukẹcha vwọ k'ihw'eje.

(Ekuo)

3. Vw'asan wọ dia, vw'ukoko wẹn,
 Vwobọ vw'iruo r'ukoko na.
 Yon'ejajẹ r'ihw'efa jẹ,
 Ke se ghwoghwo vwọ k'ihw'eje.

(Ekuo)

1. E ded'ovwan ri koko vw'etine.
Vwọ k'uyono r'Ota r'Oghene.
Jihov'Oghene yen durhi'avwanre.
E j'avwanr'ejobi kerhọ r'Ota royen.
2. Jihova si'avwanre rhi'ukoko na,
Rọ nerhe vw'iniọvo vw'akpọje.
Je vw'eguonọ r'iniọvo r'avwanre,
E mi ji ded'ihwo re vwomab'avwanre.
3. Oghene durh'ihworakpọ n'eje,
N'ayen rhe kerhọ r'Ota royen.
O ded'avwanre womari Jesu,
Gba vw'ubiudu w'eje vwo ded'ihwo reyọ.

1. Mọ wo rhi yono kpahi Jihov'Ọghẹnẹ.
 'Biko yanrhe wọ rhe d'ame r'arhọ.'
 Ota r'Ọghẹnẹ, y'ame r'arhọ na.
 Je durh'ihw'eje vwọ rhe d'ame na.
2. E ja davwẹngba vwo kp'emẹvwa r'avwanre.
 E je gbẹdẹ r'emẹvwa nana rẹ.
 Ẹw'ọfuanfon na Kugb'iniọvo na;
 E cha vw'ẹgba v'ukẹcha k'avwanre.
3. Ine r'ukoko na, a mrẹ vwo dj'ayen rẹ!
 Eta r'iniọvo na je vwerh'oma!
 Je kuomakugbe ihwo r'Ọghẹnẹ.
 Je kuomakugb'iniọvo r'avwanre.

87 *Yanrhe! Wo Vwo Urovwoma*

(Hibru 10:24, 25)

1. Avwanre yerẹn vw'akpọ rọ pha brabra,
 lhwo buebun ri'Ọghẹnẹ rẹ.
A guọn'uchebro v'ukẹcha r'Ọghẹnẹ,
 Avwanre vwo phikparobọ.
Emẹvwa r'avwanre yen b'avwanre gan,
 Je nẹrhe vw'iphiẹrophiyọ.
E nẹrh'esegbuyota r'avwanre gan,
 Je nẹrhe vw'omavwerhovwẹn.
A cha yọnr'irhi ri Jihov'Ọghẹnẹ,
 E ji che ru'ọhọre rọyen.
Emẹvwa nẹrhe ru'obo ri yovwirin,
 Ji vw'ẹguọnọ r'uyota na.
2. Jihova nabọ ri'ọdavwẹ r'avwanre,
 Ja kerhọ r'uchebro rọyen.
E de vw'aghwanre je vwerosu'Ọghẹnẹ,
 Ke che kp'emẹvwa ọkieje.
Ekpako r'ukoko na yon'avwanre
 Obo ra sa vwọ yonregan.
Iniọvo r'avwanre reh'akpọneje
 Ch'avwanr'uko vwo mudiagan.
Avwanr'eje vwọ hẹrh'akpọ kpokpọ na,
 Je siomakoko g'Ọghẹnẹ.
Emẹvwa cha nẹrh'avwanre vw'aghwanre
 Re vwo yer'omamọ r'akpọ.

1. Jihova, avwanre koko vw'etinẹ,
Kidie wẹwẹ yin durhi'avwanre.
Eta wẹn n'ẹje, urhukpẹ k'avwanre.
Eta na wo vwo yon'avwanre.

(EKUO)

*Gbe yon'uvwe me vwọ ri'idjerhe wẹn,
Ju vwe kerhọ r'iji r'aghwanre wẹn.
Ju vwe nene idjerhe r'uyota,
Ju vwe nabọ vw'ẹguọno r'irhi wẹn.*

2. Jihova, a mọ vwo dj'aghwanre wẹn ẹ,
Avwanre vwerosu'orhiẹnbro wẹn.
Eta wẹn n'ẹje, e vọnre v'igbunu.
Eta wẹn uyota ọkieje.

(Ekuo)

89 *Kerhọ, Nyẹme, Wọ Mre Ebruphiyọ* (Luk 11:28)

1. E ja nabọ nyẹme ri Jesu Kristi.
E j'avwanre nen'odjeke rọyen.
Ọ cha nẹh'avwanre vw'omavwerhovwẹn.
E de nyẹme ke che vw'ebruphiyọ.

(EKUO)

*Wọ da kerhọ ji nyẹme,
'Ghẹne ko bruba kẹ wẹ.
Wọ da guọn'ebruphiyọ r'Ọghẹne,
Wọ me kerhọ ji nyẹme.*

2. E de nyẹme ka cha dia ker'uwevwin
Ra nabọ bọn phiy'enu r'oragha.
E de nen'odjeke ri Jesu Kristi,
K'avwanre che yer'omamọ r'akpọ.

(Ekuo)

3. Avwanre cha hoh'urhe rọ kẹ'ame,
Rọ nabọ mọ ọke rọyen de te.
E de nyẹme r'Ọghẹne ọkeneje
Ka cha mr'ebruba v'arhọ ri bẹde.

(Ekuo)

90 *Phiuduphiyo Ohwohwo Awọ*

(Hibru 10:24, 25)

1. Je phiuduphiyawọ r'ohwohwo
Vwọ gi Jihova ọkieje,
Eguṇọ r'avwanre kọ cha gan,
Ke che ji vw'oyerinkugbe.
Eguṇọ r'idibo r'Ọghẹṇẹ
Ch'avwanr'uko vwo chirakon,
Ukoko r'avwanre y'adjarhọ
Rọ vw'ufuoma vwọ k'avwanre.
2. Ota ra ta vw'ọke ro fori,
Ọ nẹh'ubiudu r'ohwo gan.
E ny'eta r'ọbongan tiyena
Vw'unu r'iniṇvo r'avwanre.
Mavọ y'ṇana vwerh'oma te,
A v'iniṇvo vwọ ga kugbe!
Ja davwengba vwọ b'ohwohwo gan,
Vw'ukẹcha vwọ k'iniṇvo na.
3. Ẹḍẹ rode na sikẹri re,
Ẹḍẹ rode ri Jihova.
E je siomakoko ọkieje,
Ra vwọ sẹro r'oyonregan.
J'avwanre v'idibo r'Ọghẹṇẹ,
Kuomakugbe vwọ ga bẹḍẹ.
Je phiuduphiyawọ r'ohwohwo
Vwọ gi Jihova bẹwweḍẹ.

91 *Iruo rẹ Ẹguṇọ rẹ Avwanre* (Une Rẹ Ejiro 127:1)

1. Jihova wẹ kobiruo,
Avwanre vw'akpẹvwẹ kẹ wẹ.
Ọghọ wọ k'avwanre v'ebruba,
Unu se gbe rẹ!
Avwanre mr'ebruba wẹn
Vw'iruo r'ẹguṇọ r'avwanre.
Gba mr'uwevwın nana ro mudia,
Wẹwẹ kobiruo.

(EKUO)

*Ọnan'okpuphen wọ k'avwanre
Ra vwọ b'uwevwın na kẹ wẹ.
Biko Jihova gbe j'avwanre vw'ẹga kẹ wẹ,
Je vw'ujiri vwọ k'ode wẹn.*

2. Oma ra vwerh'avwanre
Fikir'iniọvo r'avwanre.
Ẹguṇọ r'iniọvo r'avwanre,
A mrẹ wọ dje rẹ!
Womar'ew'ọfuanfon wẹn,
Avwanre sa vwọ wian kugbe.
Ọnana vw'urinrin v'ujiri
Vwọ k'ode wẹn na!

(Ekuo)

1. Ọnan'oghọ rode, Jihova,
 Ra vwọ b'uwewwin vwọ kẹ wẹ!
 A vwerọ kpahotọ vwọ kẹ wẹ,
 Ọ vwọ ghw'urinrin rh'ode wẹn.
 Erọnvw'ejobi ri rh'avwanre,
 Wẹ yen vw'ayen vwọ k'avwanre.
 Egba v'ekuakua r'avwanr'eje,
 Avwanre vw'ayen kpahotọ.

(EKUO)

*A vw'uwewwin nana kẹ wẹ,
 E ja vw'ode wẹn vwo se.
 A vwerọ kpahotọ kẹ wẹ,
 Biko rhiabọ wẹn reyọ.*

2. Ja vw'urinrin kẹ wẹ, Jihova,
 E je muoghọ k'uwewwin wẹn.
 E j'ihw'eje ri yon'Ota wẹn
 Vw'urinrin v'oghọ k'ode wẹn.
 Ọnan'uwewwin ra da ga wẹ,
 J'avwanre nabọ vwerote.
 Jọ di'oseri vwọ k'ihwo n'eje,
 Ji ghwoghw'ode wẹn k'akpoeje.

(Ekuo)

93 *Bruphiyọ Emẹvwa rẹ Avwanre* (Hibru 10:24, 25)

1. Bruphiy'emẹvwa r'avwanre,
 Jihova, 'vwanre rẹ wẹ.
 Wẹ kobiruo, vwọ k'emẹvwa,
 J'ewen wen v'avwanre dia.
2. Biko ru'ẹga r'avwanre fon;
 J'ota wen mu'avwanr'ero.
 J'avwanre t'ona r'aghwoghwo.
 J'avwanre dj'ẹguonọ phia.
3. Bruphiy'emẹvwa r'avwanre,
 J'avwanre yerin kugbe.
 J'eta v'uruemu r'avwanre
 Vw'urinrin vwọ k'ode wen.

Dje Ọdavwaro Phia Fikire
Ota rẹ Ọghẹnẹ
(Filipae 2:16)

1. Jihova Ọghẹnẹ, wẹwẹ kobiruo.
Ifikir'Ota wẹn wọ vwọ k'avwanre!
Wọ vw'ihwo vwo si'Ota na
Womar'ew'ọfuanfon.
Ota wẹn y'urhukpe wo vwo su'avwanre.
2. Ota wẹn na vw'ẹgba, o ji t'ubiudu.
Ọ nabọ hi'evun v'iroro r'avwanre.
Irhi wẹn v'orhiẹnbro wẹn,
e vọnre v'aghwanre.
Okieje y'irhi wẹn che vwo su'avwanre.
3. Wọ rey'ihworakpọ vwo si'Ota wẹn na.
Emraro wẹn na ihwo ker'avwanre.
Wẹ kobiruo Jihova fikir'Ota wẹn na.
Biko ch'avwanr'uko vwo muọghọ vwọ kẹ.

1. Emraro r'Ọghẹnẹ guṇọ rịen Kristi,
 Ọ rọ nẹrhe vw'iphierophiyo.
 Ọghẹnẹ tare ni Mesaya cha rhe,
 Kọ cha vw'usivwin vwọ k'avwanre.
 Ọke na tere, Mesaya na suẹn re,
 Avwanre mr'ọnana vughe.
 Aghọghọ rode ra vwọ ri'emu nana,
 R'emekashe na je guṇọ rịen!

(EKUO)

*Idjerhe r'avwanre lo phiyo,
 Avwanre yan vw'urhukpe na.
 Jihov'Ọghẹnẹ yin su'avwanre
 Vw'idjerhe r'uyota rọyen.*

2. Jesu Kristi vw'odibo r'ọfuevun mu,
 Rọ vw'emu k'avwanre ọkieje.
 Urhukpe r'uyota ko lo ganphiyo,
 Ro se vwo t'ubiudu r'avwanre.
 Avwanre cha yan vwevunr'urhukpe na,
 Ka cha di'ugbeyan r'Ọghẹnẹ.
 J'akpẹvwi Jihova vwọ k'urhukpe na,
 E ja yan nen'idjerhe rọyen.

(Ekuo)

1. O vw'ọbe'ọvo r'Ọghẹnẹ vwọ k'avwanre;
 Rọ k'ohw'ufuoma v'iphiẹrophiyọ.
 Eta rọyen ejobi vọnre v'ẹgba;
 Ọ vw'arhọ k'ihwo ji rhiẹro rayen.
 Ọbe r'ọghanghanre na ye se Baibol.
 Ọghẹnẹ yen san'ihwo ri siro,
 Ihwo nana vw'ẹguọnọ ri Jihova,
 Ẹw'ọfuanfon rọyen mu'ayen vwo sio.

2. Ayen ji si kpah'emama r'Ọghẹnẹ;
 Obo rọ vwọ m'akpọ na v'odjuvwu.
 Obo rọ vwọ m'ihwo rẹsosuọ gbagba,
 V'obo r'iparadaisi v'ay'abọ.
 Ayen je tota kpah'amakash'ọvo
 Rọ vwọsu'Ọghẹnẹ kugb'usuon rọyen.
 Ọ da rhe ghw'ukpokpogho rh'ihworakpọ.
 Jihov'Ọghẹnẹ che siono bẹdẹ.

3. Ọke nana, ọke r'omavwerhovwẹn.
Jihova vwi Jesu vwo mu'Ovie re.
Gbe j'avwanre ghwohw'Uvie rọyen k'ihwo
V'eburphiyo r'Uvie na cha ghwa rhe.
Ọbe nana vọnre v'erọnvwọn buebun;
E ja davwengba vwọ nabọ fuẹrẹn.
Ọ cha vw'obọdẹn r'ufuoma k'avwanre.
E gbe j'avwanr'eje s'ọbe nana.

97 Ota rẹ Ọghẹnẹ Yen kẹ Ohwo Arhọ

(Matiu 4:4)

1. E j'avwanre se Baibol na,
Ọ vw'arhọ vwọ k'ohwo.
E je nen'odjekẹ rọyen
E ghanre vr'emuọre.
Ọ cha vw'ufuoma k'avwanre
Kugb'arhọ ri bẹdẹ.

(EKUO)

*E j'avwanre se Baibol na,
Ọ vw'arhọ vwọ k'ohwo.
Ọ cha vw'ufuoma k'avwanre
Kugb'arhọ ri bẹdẹ.*

2. Baibol na vọnre v'ikuegbe
R'idibo r'Ọghẹnẹ.
Eya v'eshare ri fuevun,
Re vwẹrosu'Ọghẹnẹ.
E gbe je s'ikuegbe rayen,
E cha b'avwanre gan.

(Ekuo)

3. Gbe j'avwanre se Baibol na,
 Ọ vọnre v'aghwanre.
 Ọ cha vw'ukẹcha k'avwanre
 Vw'ọke r'edavwini.
Ja yọnr'irhi ri Baibol na,
 Ke che vw'ebruphiyọ.

(Ekuo)

Ewẹn rẹ Ọghẹnẹ Yen
Vwo Si Baibol Na
(2 Timoti 3:16, 17)

1. Ota ri Jihov'Ọghẹnẹ
Y'urhukpẹ ro su'avwanre.
E de nen'odjekẹ rọyen,
Ọ cha nẹha mr'ebruphiyọ.
2. A sa ri'ọhọre r'Ọghẹnẹ,
A da fuẹr'Ota rọyen.
Ọ cha vw'ukẹcha k'avwanre
Vwọ g'Ọghẹnẹ v'ubiudu'eje.
3. Baibol na cha nẹh'avwanre
Rhe ri'ẹguonọ r'Ọghẹnẹ.
E de se, ke che vw'aghwanre,
Ke ji che vw'arhọ ri bẹdẹ.

1. Avwanre vw'iniọvo buebun
 Vwevunr'akpọneje.
 Ayen nabọ yonregan
 Ji vw'esegbuyota.
 Iniọvo r'avwanre na,
 I buẹnphiy'ọkieje
 Avwanre vw'ujiri k'Ọghẹnẹ
 Vwevunr'akpọneje.

2. Avwanre vw'iniọvo buebun
 Vwevunr'ẹkuot'eje
 Ri ghwoghw'Uvie r'Ọghẹnẹ
 Vwọ k'ihworakp'eje.
 Vwevunr'iruo r'Uvie na,
 Oma sa ghwọr'ohwo.
 Jesu Kristi vw'ẹgba v'ufuoma
 Vwọ k'ihwo r'oma bẹn.

3. Avwanre vw'iniọvo buebun
 Vw'ukoko r'Ọghẹnẹ.
 Ọ sẹro r'avwanr'eje,
 E ja vw'ujiri kẹ.
 J'avwanre v'iniọvo na
 Ghwoghw'Uvie r'Ọghẹnẹ,
 E je nen'Ọghẹnẹ wian kugbe,
 Ja vw'ẹga kẹ bẹdẹ.

1. Jihova y'Ọghẹnẹ rọ m'ẹrọnvw'eje.
 Ọ vwẹrot'avwanre ji dj'ẹguṇọ phia.
 Ọ vw'osio k'avwanre,
 Ọ vw'uvo k'avwanre.
 Ọ je vw'emu v'ame k'avwanre.
 E de ruṣe k'ihwo re guṇ'ukẹcha,
 J'Ọghẹnẹ y'avwanre vwẹrovwokere.
 Ja vw'ukẹcha k'ihwo.
 Je dj'ẹguṇọ k'ihwo.
 Ka cha mr'eburuphiyọ r'Ọghẹnẹ.

2. Vw'ukẹcha vwọ k'ihwo re guṇ'ukẹcha.
 Ọ cha nẹh'avwanre vw'omavwerhovwẹn.
 Rhiabọded'ihw'eje, dj'ẹguṇọ k'ihw'eje,
 Dj'uruemu'esiri vwọ k'ay'eje.
 Keri Lidia, gba ta: 'Kọn rhi'uwevwin mẹ.'
 Gbe rhiabọded'ihwo, vwẹrovwot'ayen.
 Jihov'Ọghẹnẹ wẹn cha hwosa vwọ kẹ wẹ,
 Wọ da nabọ ruṣe vwọ k'ihwo.

101 *Wian Kugbe vẹ Oyerinkugbe* (Efesos 4:3)

1. Ọghẹnẹ si'avwanre t'oma,
 Vwo n'akpọ r'umwemwu nana.
Ufuoma v'oyerinkugbe
 Nẹha mr'ebruphiyọ.
Oyerinkugbe na,
 A mrẹ vwo dje rẹ.
Je vwobọ vw'ẹga r'Ọghẹnẹ.
 Jesu Kristi yin su'avwanre.
E gbe ja vwomakpahotọ
 Vwọ k'ẹga r'Ọghẹnẹ.

2. E ja nẹhovwo k'Ọghẹnẹ,
 E vwo dj'ẹguọnọ k'iniọvo,
Ke che vw'ufuoma v'aghoghọ
 Ji t'oyerinkugbe.
Obọdẹn r'ufuoma,
 A mrẹ vwo dje rẹ.
E de dj'ẹguọnọ k'iniọvo,
 Ka cha mr'ufuoma r'Ọghẹnẹ.
Jihova cha ch'avwanr'uko
 Vwọ vw'ẹga kẹ bẹdẹ.

102 “*Cha Otu re Ewịere Uko*”

(Iruo Rẹ Iyinkon Na 20:35)

1. Avwanr’ihwo ri jẹgba
V’evwịere buebun.
Jihova ji vw’ẹguonọ
R’avwanr’ejobi.
Ọ vonre v’ẹguonọ,
O ji gb’arodonvwẹ.
E gbe ji dj’ẹguonọ phia,
Vw’ukẹcha k’ihwo.
2. Iniọvo re tobọ gan,
E je sa vwiere.
E ja vw’eta r’ọbongan
Vwo bich’ay’eje.
Oghẹnẹ r’avwanre
Cha vw’ẹgba vwọ k’ayen.
Je dj’erorokẹ k’ayen,
Vw’uchebro k’ayen.
3. Iniọvo re vwiere na,
Je roro k’ayen.
E ja vw’ukẹcha k’ayen
V’ewen r’esiri.
J’avwanre davwengba
Vwo dj’ẹguonọ k’ayen.
Oma kọ cha vwerh’ayen,
A da ch’ay’uko.

103 *Eshare re Vwo Ruɛse kɛ Avwanre* (Efesɔs 4:8)

1. Jihova vw'ukɛcha k'avwanre
Womar'ekpako na.
Ayen je nabɔ yon'avwanre,
Womar'udje rayen.

(EKUO)

*Oghɛnɛ rey'eshare vwo mu,
Ihwo ra sa vwɛroso.
Ayen vwɛrovwot'igodɛ na,
Je dj'ɛguonɔ vwɔ k'ayen.*

2. Ayen ji vw'ɔdavwɛ r'avwanre,
Je vwɛrot'avwanre.
Ekpako na je b'avwanre gan,
Womar'eta rayen.

(Ekuo)

3. Ayen vw'odjekɛ vwɔ k'avwanre,
Avwanre vwo j'eshe.
Ke se nen'idjerhe r'Oghɛnɛ,
Je vw'ɛga kɛ bɛdɛ.

(Ekuo)

Oke rẹ Ewẹn
Ọfuanfon rẹ Ọghẹnẹ
(Luk 11:13)

1. Jihov'Ọghẹnẹ, Ọsẹ r'avwanre,
 Wẹ yen rho vr'ubiudu r'avwanre.
 Gbe nen'avwanre mu'oghwa r'avwanre.
 Biko vw'ẹw'ọfuanfon wẹn k'avwanre.
2. Avwanr'ejobi, ihwo ri jẹgba;
 Avwanr'eje r'umwemwu s'owẹ.
 Biko Jihova, ny'orẹ r'avwanre.
 Gbe j'ẹw'ọfuanfon wẹn ch'avwanr'uko.
3. Omaemuophiyọ kugb'ofudjevwe,
 E nẹrh'ẹwẹn r'ohwo shekpoto.
 Biko Jihova, vw'ẹgba k'avwanre,
 Je vw'ẹw'ọfuanfon wẹn vwọ k'avwanre.

1. Jihova, ohwo r'eguonọ
 E ja vwerovwokere.
 E je vw'eguonọ r'Oghenẹ
 V'irive r'avwanr'eje.
 E ja vw'uruemu vwo djephia
 Ke che vw'omavwerhovwen.
 E ja vwerokeri Jesu
 Vwo dj'eguonọ vwọ k'ihwo.
2. E de vw'eguonọ r'Oghenẹ
 Ke che dj'eguonọ k'ihwo.
 E de she, kọ kpar'avwanre,
 Ọ vw'ukẹcha k'avwanre.
 Eguonọ, o vw'akoechiro;
 Eguonọ, ọ rioma rẹ.
 E de vw'eguonọ r'iniowo,
 Ke che vw'omavwerhovwen.
3. Davwengba vwo si'ophu n'evun,
 Wo ji si'eghwọ vwo n'evun.
 Wo che yon'irhi r'Oghenẹ,
 Wọ da vwomakpotọ kẹ.
 E je vw'eguonọ r'Oghenẹ
 Kugb'irive r'avwanre.
 E de vw'eguonọ r'ihw'efa,
 Ja vweroker'Oghenẹ.

1. J'avwanre nẹrhovwo k'Ọghẹnẹ,
Ja vwẹroker'iruemu rọyen.
Ẹguṇọ yen ma rho kparobọ,
Re se vwo womar'ew'ọfuanfon.
Avwanre se vw'ona v'aghwanre,
J'ẹguṇọ rho vr'enan'ejobi.
E ja vw'uruemu dj'ẹguṇọ phia,
Ọnana y'obọdẹn r'ẹguṇọ.
2. E j'avwanre ruẹse vwọ k'ihwo,
J'avwanre ji vw'ọdavwẹ r'ihwo.
Ẹguṇọ phi'ota phiy'evun rẹ,
Ọ rey'ogbeku vwo ghovw'ihwo.
Ọ ch'avwanr'uko vwo chirakon
R'edavwini v'ebẹnbẹn r'akpọ.
Obọdẹn r'ẹguṇọ shefia rẹ,
Ẹguṇọ chirakon r'emu'eje.

107 *Udje rẹ Ẹguṇọ rẹ Jihova*

(1 Jṛn 4:19)

1. Jihov'Ọghẹnẹ yon'avwanr'ejobi
Obṛḁn r'ẹguṇọ.
Ọ je vw'ọkieje dj'ẹguṇọ rṛyen phia
Vwṛ k'avwanre re vw'ẹga kẹ.
O ji'Ọmṛ rṛyen rhi ghwu vwṛ k'avwanre,
Ko se vwo ghovwo Imwemwu r'avwanre.
Ọnan'ẹguṇọ rṛ ma rho kparobṛ;
Ẹguṇọ na, Uvi r'ẹguṇọ.
2. E je vw'ẹguṇọ r'iniṛvo r'avwanre
R'akpṛeje, ọkieje.
Ko che mu'avwanre vwo vw'ṛḁavwẹ rayen
V'ubiudu'eje, ọkineje.
E de vw'ẹguṇọ ri Jihov'Ọghẹnẹ,
Ke che vw'ẹguṇọ r'iniṛvo r'avwanre.
Oruchṛ rayen, ke se vwo ghovw'ayen.
Dj'ẹguṇọ phia, Obṛḁ'ẹguṇọ.
3. Ẹguṇọ nana nẹrhe yerin kugbe
Ker'orua r'iniṛvo.
Jihov'Ọghẹnẹ yin durhi'avwanr'eje:
"Mṛ riavwerhen r'ẹguṇọ na."
E de vw'ẹguṇọ, Ke che vw'ebruphiyṛ.
Ka cha mr'aghṛghṛ womar'ẹw'ṛfuanfon,
Kugbi Baibol na, v'iniṛvo r'avwanre.
E j'avwanre dj'ẹguṇọ vwṛphia.

108 *Ẹguṇọ rẹ Ọghẹṇẹ Ro Jẹ Rheriẹ* (Aizaya 55:1-3)

1. Ọghẹṇẹ y'ẹguṇọ!

Ọ nabọ vwẹrot'avwanre.
Fikir'ẹguṇọ rọyen na,
Jesu rhi vwo ghwu k'avwanre.
Ọ nẹrhe vw'iphierophiyọ
Kugb'uphẹn r'arhọ ri bẹdẹ.

(EKUO)

*Ovwan re guṇ'ame da,
'Vwan rhe d'ame r'arhọ na.
'Vwan rhe d'ame na ọphẹ.
Mr'ẹguṇọ r'Ọghẹṇẹ.*

2. Ọghẹṇẹ y'ẹguṇọ!

Iruo rọyen dj'ọnana phia.
O ji dj'ẹguṇọ k'avwanre
Rọ vwọ vwi Jesu vwo mu'Ovie.
O che ru'ọhọre rọyen gba.
Uvie r'Ọghẹṇẹ na suẹn re!

(Ekuo)

3. Ọghẹnẹ y'ẹguonọ!

E j'avwanre ji vw'ẹguonọ.

E ja vw'ukẹcha vwọ k'ihwo,

E vwọ yonr'irhi r'Ọghẹnẹ.

E ja vw'ẹga vwọ k'Ọghẹnẹ.

E je ghwoghwota na k'ihwo.

(Ekuo)

Vwo Eguonọ
Ogangan nẹ Ubiudu Rhe
(1 Pita 1:22)

1. Avwanre de dj'eguonọ phia,
Oma kọ cha vwerh'Oghenẹ.
Eguonọ y'uruemu royen
Rọ ma rho kparobọ.
Eguonọ de n'ubiudu rhe,
O cha nẹrhe yerin kugbe.
O ji che torob'ufuoma
Kugb'omavwerhovwẹn.
- Ohwo da guon'ukẹcha,
E ja vw'ukẹcha vwọ k'ohwo na.
E je dj'eguonọ k'ihwo,
E je vw'odavwẹ r'ihwo.
- Jesu vw'ukẹcha k'avwanre
Vwọ ri'eguonọ ri Jihova.
E jo mu'avwanre dj'eguonọ
Vwo n'otọ r'ewẹn vwọ rhe.
E jo n'ubiudu vwọ rhe.

1. Ghwoghw’Uvie na, oba na sikẹri re.

Eka r’akpọ na djerephia.

Gbe ja ghoghọ Uvie na sikẹri re;

Ọke r’usivwin kẹrire!

(EKUO)

Aghoghọ r’Ọghẹnẹ k’ohw’ogangan.

Sune, sune r’ujiri kẹ.

V’ubiudu r’akpẹvwẹ v’omavwerhovwẹn,

Vw’ujiri vwọ k’ode r’Ọghẹnẹ.

Aghoghọ r’Ọghẹnẹ k’ohw’ogangan.

Gbe ghwoghw’ode rọyen k’ihwo.

Vwomakpahoto vwọ k’ẹga r’Ọghẹnẹ,

Ẹga rọyen vọnre v’aghoghọ.

2. Fiudugberi, owan re gi Jihova.

Vwẹrovwọsuọ, O vw’ogangan.

Kperi gangan, vw’ujiri ki Jihova;

Sune r’aghoghọ k’Ọghẹnẹ!

(Ekuo)

111 Obo re Nẹrhe Avwanre Ghoghọ

(Matiu 5:12)

1. Erɔnvwɔn buebun y'avwanre mrẹ,
Re nẹrh'oma vwerh'avwanre.
Ihwo buebun vw'ẹkuoto n'eje,
Vwomab'avwanre vw'akpọje.
Obo ri Baibol na yonori,
Je nẹrh'avwanre vw'aghoghọ.
E je nen'eta ri Baibol na,
Vw'esegbuyota kpah'ayen.
Erɔnvwɔn re k'avwanr'aghoghọ,
E nẹrh'oma vwerh'avwanre.
Dede n'avwanr'eje mr'ebẹnbẹn,
Jihova cha ch'avwanr'uko.

(EKUO)

*Jihova k'avwanr'aghoghọ.
Ọtiọyen ji t'iruo ọyen.
Aghwanre ọyen, v'ogangan ọyen,
I dj'ẹguonọ ọyen vwọ phia!*

2. Jihova yen m'odjuvwu v'akpọ,
Abadi v'erɔnvw'ejobi.
Igbevunu r'obo rọ mare,
Mu'avwanre vwọ vw'ujiri kẹ.
Avwanre ghwoghwo vw'akpọneje,
Aghwoghwo r'Uvie r'Ọghẹne.
Ebruphiyọ rọ je cha ghwa rhe,
Avwanre ghwoghwo v'aghoghọ.
Aghoghọ ri bẹde kẹire
Ebruphiyọ hẹh'avwanre,
Odjuvwu kpokpọ v'akpọ kpokpọ
Cha k'avwanr'omavwerhovwen.

(Ekuo)

112 *Jihova, Ọghẹnẹ rẹ Ufuoma* (Filipae 4:9)

1. Jihova, Ọghẹnẹ

R'ufuoma kugb'ẹguṇọ;
Gba k'avwanre ẹw'ọfuanfon,
Avwanre vwo vw'ebruba.
Wo siobon'Ọmọ wẹn,
Ọ nabọ fuevun kẹ wẹ.
Womar'ọyen y'avwanr'eje
Sa rhe vwọ di'ugbeyan wẹn.

2. Wẹwẹ yin su'avwanre,

Wọ je vwerot'avwanre,
Vwevunr'akpọ r'ebri nana;
Wọ vw'Ota wẹn k'avwanre.
Uvie na kẹrire,
Ebruba je kẹrire.
Gba k'avwanre ẹw'ọfuanfon,
Avwanre vwo vw'ufuoma.

3. Wo si'ihwo wẹn koko

Vw'odjuvwu kugb'akpọ na.
Avwanr'eje ghwoghw'Uvie wẹn
Vwọ k'ihworakpọ n'eje.
Womar'Uvie wẹn na,
Ifovwin ki che vwoba.
Ewata na ke cha ghoghọ,
Ji vw'ufuoma bẹvwẹdẹ.

113 *Ufuoma rẹ Avwanre Vwori* (Jon 14:27)

1. E je jiri Jihova,
 Ohwo r'ufuoma.
 O che si'ifovwin n'akpo,
 Ke che vw'ufuoma.
Jesu y'Ovie r'ufuoma,
 O ji vw'eguono.
 O de phi kparobo nu,
 Ke che vw'ufuoma.
2. Avwanre siobon'eghwo,
 V'eta r'ebrabra.
 E ru'ekuakua r'ofovwin
 Vwo kpọ r'ufuoma.
E de vwo ghovw'ohwohwo,
 Ke che vw'ufuoma.
 Ker'idibo ri Jesu,
 Je yerin kugbe.
3. Avwanre de vw'ufuoma,
 Ka cha mr'ebruba.
 Ja yonr'irhi r'Oghene
 V'omavwerhovwen.
A cha mr'avwanre vughe,
 E de vw'ufuoma.
 Vwevunr'akpo kpokpo na,
 Ufuoma cha dia.

'Vwo Edirin'

(Jems 5:8)

1. Ọghẹnẹ ri bẹvwẹdẹ,
 Wo che ru'ode wẹn na fuanfon.
 Wo ghini vw'owenvwe na
 Wo vwo si'ekan vwo n'ode wẹn.
 Wo vw'edirin v'erhiorin
 Vwo n'ọke r'awanre rhe.
 Wo chirakon r'avwanre,
 Wo ji dj'ẹguonọ phia.
 Wọ guonọ n'ihw'ejobi.
 Rhi vw'arhọ ri bẹdi bẹdẹ
 Avwanre cha mr'ebruba
 Fikir'edirin ro rhe we.
2. E j'avwanre vw'edirin,
 Ọ cha vw'ukẹcha k'avwanre
 Vwọ kẹnoma k'umwemwu,
 Ọ cha vw'ufuoma k'avwanre.
 Ọ je cha nẹh'avwanre
 Vwọ mr'erhuvwu r'ihw'efa.
 Ọ je cha ch'avwanr'uko
 Vw'ọke r'edavwini.
 E j'avwanre vw'edirin
 V'iruemu r'inenikristi.
 Avwanre de vw'edirin,
 Ka sa vwẹroker'Ọghẹnẹ.

Vwo Ọdavwaro Kpahen
Odirin rẹ Ọghẹnẹ
 (2 Pita 3:15)

1. Jihov'Ọghẹnẹ ro me vw'ẹgba,
 Ro ji vw'ẹguṇọ r'erhuvwu.
 Oja v'umwemwu v'akpọ na,
 Ọ nẹh'ihwo muomaphiyọ.
 Ihw'evo tanẹ wo gbeghẹrẹ;
 Ẹdẹ rode na sikẹri re.

(EKUO)

*Avwanre hẹh'akpọ kpokpọ,
 Ke che jir'odẹ wẹn bẹvwẹdẹ.*

2. Ẹgbukp'uriorin vwọ k'avwanre,
 Ọy'ed'ọvo vw'ubiẹro wẹn.
 Ẹdẹ rode na kẹrire,
 Ẹdẹ nana o totọ re.
 Wo vw'utuoma r'umwemw'ejobi,
 Wọ guṇọ n'ihw'eje kurhẹriẹ.

(Ekuo)

1. Jihov'Ọghẹnẹ, wẹwẹ kobiruo;
Fikir'Ota wẹn na.
A mrẹ vwo dj'ẹgba v'aghwanre wẹn rẹ,
Wo ki ji vw'uruemu'esiri.
2. Jesu vw'uchebro k'ihwo r'ofu dje
N'ayen rha ru'ẹnwan rẹ.
Urhekpe rọyen, ọ nabọ pharhe,
Jesu ji vw'uruemu'esiri.
3. E gbe j'avwanre vwẹrovwokeri
Jihova vi Jesu.
Avwanre de ji vw'uruemu'esiri,
Oma kọ cha vwerh'Ọghẹnẹ.

1. Jihova, Ọsẹ r'avwanre,
Wo bruba vwọ k'avwanre.
Wẹ y'Ọghẹnẹ rọ pha fuanfon,
Iruo wẹn n'eje yoma.
Wo vw'ẹguonọ v'arodonvwẹ,
Dede n'avwanre ruẹ chọ.
Wo muwan r'ẹga r'avwanre,
Wẹ y'avwanr'eje cha ga.
2. Ihwo re vw'ẹga vwọ kẹ wẹ,
Nabọ vwẹroker'uwe.
Womar'iruemu ray'eje,
Kugb'iruo r'aghwoghwo na.
Uchebro wẹn v'ekpako na
Ji dj'uyoyovwin wẹn phia.
K'avwanre ẹw'ọfuanfon wẹn
Vwo dj'uruemu nana phia.
3. Biko j'avwanre dj'uruemu
R'uyoyovwin k'ihw'eje.
Ma rho k'iniọvo r'avwanre
Reh'evunr'akpọneje.
E je djephia vw'ukoko na,
Kugb'orua v'asan n'eje.
A cha mr'ebruba r'Ọghẹnẹ,
E de djephia ọkieje.

118 ‘Ru Esegbuyota Avwanre Ganphiyo’

(Luk 17:5)

1. Fikiri jẹgba r’avwanre, Jihova,
 Ẹwẹn r’avwanre vọnre v’umwemwu.
Jo vw’ọkiọvo rọ vwọ bẹn vwọ k’avwanre
 Re vwo vw’esegbuyota kpah’owẹ.

(EKUO)

*Biko vw’ukẹcha k’avwanre Jihova,
 Vwo ru’esegbuyota r’avwanre gan.
Ch’avwanr’uko fikir’arodọnvwẹ wẹn,
 Avwanre vwọ nabọ muọghọ kẹ wẹ.*

2. Biko brub’esegbuyota r’avwanre.
 Ababọ rọyen a sa ga wẹ rẹ.
Esegbuyota cha sẹro r’avwanre,
 Oshọ vuọvo rhe che mu’avwanre rẹ.

(Ekuo)

119 *E jẹ Avwanre Vwo Esegbuyota*

(Hibru 10:38, 39)

1. Ọke r'awanre womar'emraro

Jihova tota vwọ k'ihwo.

Asaọkiephana womari Jesu,

Ọ vu'ihwo n'ekurherię.

(EKUO)

J'avwanre vw'esegbuyota,

Je ru'esegbuyota na gan.

Ja vw'iruo vwo dj'onana phia,

Avwanre se vwo vw'arhọ ri bẹdẹ.

2. Jesu vu'avwanre ne ghwoghwota na

Vw'asan r'akpọ na herite.

Je ghwoghw'Uvie na vwọ k'ihw'ejobi,

E j'oshọ mu'avwanre rẹ.

(Ekuo)

3. Je ru'esegbuyota r'avwanre gan;

E j'avwanre fiudugberi.

Jihov'Ọghẹnẹ cha ch'avwanr'uko.

Usivwin sikeri re.

(Ekuo)

120 *Vwẹrokere Omaevwokpotọ rẹ Jesu*

(Matiu 11:28-30)

1. Jesu y'ohwo ọ ma rho ọ di'akpo na,
 Jo kenoma k'uruemu r'omaekparọ.
 Jihova kẹ'edia ro me kpenu'eje,
 Jo nabọ vwomakpotọ ọkineje.
2. Jesu Kristi vu'ihwo r'ofu r'akpo dje,
 No che nen'ayen vwo mu'oghwa ray'eje.
 Ayen da je guṣon'Uvie r'Ọghẹṇẹ na,
 Ọ cha vw'ufuoma v'ebruba vwọ k'ayen.
3. Jesu Kristi tare n'avwanr'iniṣo,
 J'avwanre vwomakpotọ k'usuon ọyen.
 Ihwo ri ru'otiṣyen ghanre k'Ọghẹṇẹ,
 O veri n'ayen cha di'akpo na bẹḁe.

121 *Avwanre Guṇọ Omaṛiṇsuon*

(Rom 7:14-25)

1. Jihov'Ọghenẹ y'avwanre cha ga.
Ja guṇọ'omaṛiṇsuon fikir'ijẹgba.
Oja v'ughwu y'umwemwu ghwa cha.
Ẹga r'Ọghenẹ yen k'ohw'arhọ.
2. Eshu davwẹgba rọ vwọ phi'avwanre,
Ijẹgba r'avwanre ji kpokp'avwanre.
Uyota na vw'ẹgba vr'umwemwu.
Biko Jihova ch'avwanr'uko.
3. Ota v'uruemu djobọt'Ọghenẹ,
E gbe ja davwẹgba yonr'irhi rọyen.
Vw'erṇvw'eje, gba nabọ muegbe
Wo vwo su'oma wẹn ọkineje.

1. Ofu dj'ihwo vw'akpọ na nonọna.
 Oshọ ji mu'ihwo buebun nonọna.
 J'avwanre che mudia gan ọkieje.
 E ja fuevun g'Ọghẹnẹ.

(Ekuo)

*Avwanre che mudia gan,
 Je kẹnoma k'akpọ na.
 A da je yonre gan,
 Ke vw'arhọ ri bẹdẹ.*

2. Akpọ nana vọnre v'edavwini.
 E je muegbe vwo phi'ayen kparobọ.
 E j'avwanre vw'utuoma r'umwemwu,
 Ji vw'ẹguonọ r'uyota.

(Ekuo)

3. Vw'ubiudu w'ejobi vwọ g'Ọghẹnẹ.
 Davwẹngba vwo vwobọ vw'iruo rọyen.
 Gba nabọ ghwoghwota na vwọ k'ihwo,
 Uvie na sikẹri re.

(Ekuo)

123 *Vwomakpotọ kẹ Usuon rẹ Ọghẹnẹ*

(1 Kọrẹnt 14:33)

1. Ihwo ri Jihova ghwoghwo vw'akpọje,
Ayen ghwoghwo'Uvie na v'ebruba rọyen.
Ayen vwomakpotọ k'Usuon r'Ọghẹnẹ,
Ayen ji vw'omamọ r'oyerinkugbe.

(EKUO)

*E gbe j'avwanre vwomavwokpotọ
k'Ọghẹnẹ r'avwanre.
O bich'avwanre, sẹro r'avwanre;
E ja fuevun k'Ọghẹnẹ.*

2. Ọghẹnẹ k'avwanre ẹw'ọfuanfon na.
V'odibo rọ fuevun ro su'avwanr'ẹje.
Ru'ọhọre r'Ọghẹnẹ v'omavwerhovwẹn,
Ji ghwoghwota rọyen vwọ k'ihwo n'ẹje!

(Ekuo)

1. E ja fuevun ki Jihova,
 E je vw'ẹguṣoṣo ọyen.
 E j'avwanre vwomakpotọ,
 E ja yonr'irhi ọyen.
 E j'avwanre vwẹrovwoso
 Uchebro v'ota ọyen.
 'Ghẹẹ fuevun, ja vwẹrosuọ.
 E ja k'ẹbẹre ọyen.
2. E ja fuevun k'iniṣo na,
 Ch'ay'uko ọkineje.
 Vwerot'ayen, vwerosu'ayen,
 Ji vw'ẹguṣoṣo ray'eje.
 E je muṣgho k'iniṣo na
 V'ubiudu r'avwanr'eje.
 E ja fuevun vwọ k'ay'eje,
 Je bich'ayen ọkineje.
3. E ja fuevun nen'uchebro
 V'odjeke r'ukoko na.
 E ja vw'ẹwen r'avwanr'eje
 Nabọ nen'odjeke na.
 Ebruphiyọ ri Jihova,
 Koy'avwanr'eje cha mrẹ.
 A da fuevun ọkineje,
 Ka cha di'emọ r'Ọghẹẹ.

125 “Ebruba kẹ Ihwo ri Ni Aruẹdon”

(Matiu 5:7)

1. Jihova vọn v’arodonvwẹ.
O gb’arodonvwẹ vwọ k’ihwo.
Ọ guṇọ vw’ukẹcha k’ayen.
Kidie o vw’odavwẹ rayen.
Irumwemwu de kurheriẹ,
O che gb’arodonvwẹ k’ayen.
Ọ riẹn n’avwanre gbare rẹ,
Ko gb’arodonvwẹ k’avwanre.
2. E de r’umwemwu su’Ọghẹnẹ,
Ja nokpẹn r’evwoghovwo mie.
Jesu Kristi yon’avwanre
Obo ra cha nẹrhovwo wan:
“Biko gbe vwo ghovw’avwanre,
Avwanre che vwo ghovw’ihwo.”
E de ji si’ophu vwo n’evun,
Ka cha mr’ufuoma v’aghoghọ.
3. Avwanre de ruẹse k’ihwo,
E ja kẹnoma k’omaephuo.
A da kọkẹ ro n’ẹwẹn rhe,
Aghoghọ ko ji che norhe.
Ọghẹnẹ nabọ mr’iruo wẹn,
Ọ je cha hwosa vwọ kẹ wẹ.
Ihwo ri gb’arodonvwẹ na,
E pha ghanghanre k’Ọghẹnẹ.

1. Gba rhẹrẹ, wo ji mudia gan.
Muegbe wo vwo chirakon.
Yonregan ji fiudugberi,
Ophikparobọ muẹro.
Nen'odjekẹ ri Jesu Kristi,
E j'avwanr'eje vwerovwosuọ.

(EKUO)

*E ja rhẹrẹ, nabọ mudia gan!
Yonre gan re duvw'oba!*

2. Gba rhẹrẹ, wọ nabọ kerhọ,
Je sẹro r'iroro wẹn.
Kerhọ r'odjekẹ ri Jesu
Womar'odib'ofuevun.
Nen'uchebro r'ekpako wọ phia,
Re sẹro r'igodẹ r'Ọghẹnẹ.

(Ekuo)

3. Gba rherẹ, vw'oyerinkugbe
Vwo ruiruo r'aghwoghwo na.
Ivwithrẹn cha vwosu'avwanre,
Je che ghwoghwo ri t'oba.
Je kuomakugbe jir'Oghẹnẹ.
Ẹdẹ rode na sikeri re!

(*Ekuo*)

127 *Oka rẹ Ohwo ro Fori nẹ Me Dia*

(2 Pita 3:11)

1. Die me sa vwọ kẹ wẹ, vwọ hwosa kẹ wẹ,
Jihova Ọghẹnẹ, ifikir'arhọ mẹ?
Me rey'Ota wẹn vwọ fuẹr'ubiudu m'ẹje.
Biko chọnvwuko me vwọ yan nen'irhi wẹn.

(URHIẸ)

Me vwomakpahotọ n'owẹ yen me ga.
Vw'ẹdẹ r'akpọ m'ẹje, mi che ru'ọhọre wẹn.
Me cha nabọ ga wẹ v'ubiudu m'ẹje,
Ju vwe ru'obo re cha kẹ w'aghọghọ.
Vw'ukẹcha vwọ kẹ vwẹ vwọ fuẹr'oma mẹ.
Me vwọ ri'oka r'ohwo wọ guṇọ ne me dia.
Wọ nabọ fuevun k'ihwo re fuevun kẹ wẹ.
Ju vwe ru'obo re cha nẹh'oma vwerh'owẹ.

1. Ota kugb'ive r'Ọghẹnẹ
Nẹrhe se chirakon.
Erọnvw'eje wo yonori,
E nabọ vọn v'imuẹro.
Mudia gan vw'esegbuyota,
Oba na sikẹri re.
Edavwini che ru we gan.
Sẹro r'ọyọnregan wẹn.
2. Nabọ sẹro r'ẹguọno wẹn,
Wo jọ vawabọ ẹ.
Dede n'edavwini cha rhe,
Davwengba vwo chirakon.
Ebẹnbẹn de t'avwanr'oma,
E j'oshọ mu'avwanre ẹ.
Jihova cha vw'ukẹcha phia,
O che bich'avwanr'eje.

3. Ihwo ri chirakon t'oba,
Iyin che vw'usivwin.
E che si'edẹ ray'ejobi
Phiy'evunr'ọbe r'arhọ.
J'odirin ruiruo ọyen gba,
Muegbe wo vwo chirakon.
Jihova che bruba kẹ wẹ;
Wọ cha mr'omavwerhovwẹn.

1. E je chirakon,
Ebenben de t'avwanr'oma.
Jesu vwọ rioja,
Ọ mr'aghoghọ rọh'obaro.
O mu'ewen rọy'eje
Kpah'ive r'Ọghẹne.

(EKUO)

*E j'avwanre chirakon,
Ji vw'esegbuyota.
Eguonọ rọyen muero.
E gbe j'avwanre chirakon t'oba.*

2. Dede n'avwanre
Mr'ojaeriọ vwevunr'akpọ na,
E ja tẹnrovi
Ebruba r'Uvie r'Ọghẹne.
Ja fuevun ọkieje
E se vwo vw'arhọ na.

(Ekuo)

3. A cha djoshọ rẹ,
Ofu ji che dj'avwanre rẹ.
E ja g'Oghẹnẹ,
Ẹdẹ rode na kẹrire.
J'avwanre chirakon,
Oba na totọ re.

(Ekuo)

1. Ẹguṇọ mu'Ọghẹṇẹ
Vwo siobon'Omọ rọyen,
Avwanre vwọ mr'evwoghovwo,
Ji vw'arhọ ri bẹvwẹḁẹ.
Avwanre de kuoborherię,
Ko che vwo ghovw'avwanre.
Nẹrhovwo vwọ k'evwoghovwo
Womar'otanhirhe na.
2. A cha mr'evwoghovwo,
E de ji vwo ghovw'ihwo,
A da vwẹroker'Ọghẹṇẹ
Vwo gb'arodonvwẹ k'ihwo.
E je chirakon r'ohwohwo,
E je si'ophu vwo n'evun,
E je muoghọ vwọ k'iniọvo,
E je dj'ẹguṇọ k'ayen.
3. E j'avwanr'ejobi
Gb'arodonvwẹ vwọ k'ihwo.
Ọ cha nẹrhe si'ophu n'evun,
Ji dj'ẹguṇọ vwọ k'ihwo.
Ja vwẹrokeri Jihova,
Ọ rọ vọnre v'ẹguṇọ.
Je vw'uruemu r'evwoghovwo,
Ka sa dia ker'Ọghẹṇẹ.

131 “Obo rẹ Ọghẹnẹ Tan Kugbe Nu”

(Matiu 19:5, 6)

1. Ọy’emu r’aghoghọ,
Ihw’ivẹ da rọvwọn.
Ayen de ve vw’obaro
r’Ọghẹnẹ kugb’ihwo.

(EKUO 1)

*O veri ki Jihova
Nọ guọn’aye rọyen.
Ob’Ọghẹnẹ kugbe nu,
E j’ohwo hẹriẹ rẹ.*

2. Ayen yar’Ọghẹnẹ
Nọ vw’ukẹcha k’ayen,
Ayen vwo ny’Ota rọyen,
Orọnvwe na vwọ tọn.

(EKUO 2)

*O veri ki Jihova
Nọ guọn’ọshare na.
Ob’Ọghẹnẹ kugbe nu,
E j’ohwo hẹriẹ rẹ.*

1. Ọnana yen ubeku mẹ

Kugb'uvwo mẹ, mi vw'ọrive re.

'Ghẹnẹ yen kẹ vw'ọrive na,

Mi vw'ẹguọno ọyen.

Avwanre cha mr'ebruphiyo,

Avwanre je cha hẹri'oma rẹ.

Avwanre ke cha dia kugbe

Ker'aye gb'ọshare.

Avwanre cha g'Ọghẹnẹ kugbe,

Che yerin kugbe

Ji vw'obọden r'ẹguọno.

Ja davwengba vwo ru'ive na,

K'avwanre che vw'omavwerhovwen.

Avwanre cha gi Jihova.

Mi che vw'ẹguọno wen bẹdẹ.

133 *Ga Jihova Vwẹ Ọke rẹ Eghene* (Aghwoghwo 12:1)

1. Avwanr'imighene re g'Ọghẹnẹ,
 Jihova vw'ẹguọno r'avwanr'eje.
 Ọ je cha vwerot'avwanr'ejobi,
 Ka cha mr'ebruba v'omavwerhovwen.
2. E ja vw'ubiudu r'avwanr'ejobi,
 Vwo muoghọ k'esẹ v'ini r'avwanre.
 Ihwo ki che vw'ẹguọno r'avwanre,
 Ka je cha di'ugbeyan ri Jihova.
3. E ja g'Ọghẹnẹ vw'ọke r'eghene,
 E mi ji vw'ẹguọno r'uyota na.
 A da vw'ẹgba r'avwanre g'Ọghẹnẹ,
 Oma r'avwanre kọ cha vwerhọn dẹn.

Emọ, Eyen Okẹ
Ọghẹnẹ Vwọ kẹ Avwanre
 (Une Rẹ Ejiro 127:3-5)

1. Ọshare v'aye da ọvwọn,
 Ayen de ji vwi'omọ r'obọ rayen.
 K'ayen cha vwerovwot'omọ na,
 J'ona di'oghwa ray'ovo rẹ.
 Jihova yen vw'omọ na k'ayen.
 Ọyen vw'arhọ, Ọghẹnẹ r'ẹguonọ.
 Ọ rey'odjeke vwọ k'emiovwon,
 Odjeke ọ vọnre v'aghwanre.

(EKUO)

Ọnan'okẹ ọ pha ghanghanre,
Ọy'Ọghẹnẹ phiy'obọ wẹn.
Yon'omọ wẹn Ota r'Ọghẹnẹ,
Ọ cha nẹrhọ mr'ebruphiyọ.

2. Obo ri Jihova tare,
 E je nabọ di'evunr'ubiudu wẹn.
 Vw'eta nana vwo yon'emọ wẹn,
 Ọnan'iruo ra vwọ kẹ wẹ.
 Gbe yon'ayen vwevunr'idjerhe,
 Wo de sherhẹn kugb'ọke wo de vřen.
 K'ayen cha vw'ubiudu ray'eje
 Vwọ g'Ọghẹnẹ je mr'ebruphiyọ.

(Ekuo)

Uvi Oyare rẹ Jihova:
“Ghwanre, Ọmọ Mẹ”
 (Isẹ 27:11)

1. Eghene r'ọshare v'aye
 kerhọ kẹ vwẹ.
 Oma kọ cha vu'ọvweghřen
 rọ vwo vwẹ jehwẹ.
 Wọ vw'ubiudu w'ejobi
 vwọ vw'ẹga kẹ vwẹ;
 Wo dje k'akpọneje
 n'omẹvwẹ yen wọ ga.

(EKUO)

*Eghene mẹ, wọ ghanre kẹ vwẹ,
 Wo mi r'ubiudu mẹ ghọghọ.
 Wo brorhiẹn wọ vwọ vw'ẹga kẹ vwẹ.
 Wọ guọnọ vw'ujiri kẹ vwẹ.*

2. Ghọghọ, wọ vw'ẹgba
 w'ejobi vwo jir'uvwe.
 Wọ da yan chọ ji she,
 me cha kpar'owẹ vrẹn.
 Igbeyan v'ihwo r'orua wẹn
 da je sen wẹn,
 Jọ nabọ muwẹro nu wọ
 ghanre kẹ vwẹ.

(Ekuo)

Jihova Cha Hwa
“Osa rọ Vọnre” kẹ Wẹ
 (Rutu 2:12)

1. Jihov’Ọghẹnẹ, ọy’ohwo rọ fuevun,
 O ji vugh’idibo rọyen.
 Ọ rien n’ayen se fiabọ r’erọnvw’evo
 Fikir’iruo r’ẹga rayen.
 Ọ sa di’uwevwin, igbeyan yẹ’orua,
 Jihov’Ọghẹnẹ ri’ọnana.
 Ọ vw’iniọvo r’ukoko na k’avwanre,
 Kugb’ive r’arhọ ri bẹde.

(EKUO)

*Jihov’Ọghẹnẹ che bruba kẹ wẹ,
 Ọ je cha nabọ hwosa vwọ kẹ wẹ.
 Ọ cha sẹro wẹn je chọnwuko.
 Jihova, Ọ fuevun, Ohwo r’uyota.*

2. Fikir’okpetu v’ukpokpogho r’akpọ,
 Avwanre se muomaphiyọ.
 Ọkiọvo dede ebẹnbẹn r’akpọ na
 E sa nẹh’ofu dj’avwanre.
 Jihov’Ọghẹnẹ cha vw’ukẹcha kẹ wẹ;
 Ọ cha kerhọ r’ẹrhovwo wẹn.
 Ọ cha chọnwuko womar’ẹw’ọfuanfon,
 Ota rọyen v’iniọvo na.

(Ekuo)

*Eya re Fuevun,
Eya re Dia Inenikristi*

(Rom 16:2)

1. Sera kugb'Esta, Meri kugbi Rutu;
 Enan'emam'eya re nabọ fuevun.
 Ega r'Oghene yen ma rho vwọ k'ayen.
 Avwanr'ejobi ri'edẹ r'eya nana.
 O ji vw'efa ri vw'esegbuyota,
 A ri'edẹ rayen ẹ, ayen ji mr'ebruba.
2. Uruemu'esiri, evu'efuon v'eguonọ,
 Enan'iruemu r'ihw'eje guonore,
 Eya nana vw'iruemu nan'ejobi.
 Iniọvo r'eya ji fuevun nonena.
 Oma rayen nabọ vwerh'avwanre
 Vw'ega ri Jihova, ja vweroker'ayen.
3. Eya v'emetẹ, ini kugb'eyauku,
 We vw'omavwerhovwen vwo ruiruo r'ovwan.
 'Vwan vwomakpotọ vwo n'oto r'ewen rhe.
 Vwerosu'Oghene we j'oshọ mu'ovwan ẹ.
 Jihova cha nabọ vwerote we,
 O che bruba kẹ wẹ v'arhọ ri bẹvwẹdẹ.

1. Iniṣo re kpakore,
 Avwanre mr'ayen.
 Ayen nabọ chirakon
 V'esegbuyota.
 Evo rhe vw'irivẹ rẹ;
 Ẹgba rh'ayen rẹ.
 Biko hwosa vwọ k'ayen
 V'arhọ ri bẹḁ.

(EKUO)

*Ọghẹṇẹ r'ẹguṇọ,
 Karophiy'ayen.
 Vw'imuẹro vwọ k'ayen,
 Dj'ẹguṇọ k'ayen.*

2. Emare ri vw'esha na,
 Esha r'urinrin.
 Emare na vw'erhuvwu
 Vw'ẹro r'Ọghẹṇẹ.
 E gbe ja karophiyọ
 N'ọke rọ wanre,
 Ayen nabọ g'Ọghẹṇẹ
 Vw'ọke r'eghene.

(Ekuo)

***Mrẹ Oma Wẹn Vwẹ
Akpọ Kpokpọ Na***
(Evwophia 21:1-5)

1. Gba mr'oma wẹn, gba je mrẹ vwẹ.
Mr'avwanr'eje vwevunr'akpọ kpokpọ.
Vwẹro roro 'bo rọ cha dia,
Vw'akpọ r'ufuoma kugb'omuvwiẹ.
Orumwemwu rha cha dia rẹ,
Usuon r'Ọghẹnẹ che vwoba rẹ.
J'ọke na tere akpọ vwo kp'ọkpokpọ,
Ka cha sune r'ujiri vwo n'ubiudu rhe:

(EKUO)

*Jihov'Ọghẹnẹ, wẹwẹ kobiruo.
Usuon r'Ọmọ wẹn ru'emu'eje kpokpọ.
Ubiudu r'avwanre mwavwehwẹ v'un'ẹsuọ.
Ọghọ v'urinrin v'ejiro eje ewẹn.*

2. Gba mr'oma wẹn, gba je mrẹ vwẹ;
J'avwanr'eje rhero r'akpọ kpokpọ.
Ẹro rha mrẹ, orhọ rhe nyo,
Obo re s'uguegue v'oshọ rẹ.
Eta rọyen ji rugba re.
Jihova v'ihwo cha dia kugbe.
Ọ cha kpar'ihwo ri ghwuru vwo nushi.
Avwanre v'ayen ke cha
sune r'aghoghọ:

(*Ekua*)

1. Mr'oma wẹn vw'akpọ kpokpọ;
 Ihwo che yerin kugbe.
 Oja v'ovię ko che no!
 Ka cha ri'akpọ kuoma.

(EKUO)

Sune jir'Ọghẹnẹ!
Sune na v'aghoghọ.
E che vw'arhọ ri bẹdẹ
Vwevunr'akpọ kpokpọ.

2. Emare che kp'ighene
 Ka cha g'Ọghẹnẹ kugbe.
 Ukpokpogho ko che no
 Emiavwe ji che no.

(Ekuo)

3. Ihw'eje ke cha ghoghọ
 Ji vw'urinrin k'Ọghẹnẹ.
 Avwanre cha vw'ujiri
 Vwọ k'Ọghẹnẹ bẹdẹ.

(Ekuo)

1. Ọmọ re vwiẹre, Osio rọ rhọre,
Elo ro n'ọnre na cha, V'ekankọn na;
Ay'eje okẹ Ọghẹnẹ k'ohwo.
Ọ nabọ vwẹrot'avwanre kẹdi kẹdẹ.

(EKUO)

Ki die ya cha vw'arhọ r'avwanre na ru?
E je vw'ẹguṣọṣọ r'Ọghẹnẹ je vw'ẹga vwọ kẹ.
Avwanre cha sa dẹ Okẹ r'arhọ na rẹ.
Ọnan'omam'okẹ; Igbevunu r'arhọ.

2. Ofu se dj'ohwo Ker'ayi Jobu
Rọ tanẹ: 'Hanrh'Ọghẹnẹ rere wo ghwu.'
E ja yonregan, Je jir'Ọghẹnẹ,
Ja kpẹvwẹ fikir'arhọ rọ vwọ k'avwanre.

(EKUO)

Ki die ya cha vw'arhọ r'avwanre na ru?
E je vw'ẹguṣọṣọ r'iniṣo, vw'ukẹcha k'ayen.
Avwanre cha sa dẹ Okẹ r'arhọ na rẹ.
Ọnan'omam'okẹ; Igbevunu r'arhọ.

A Yonron Iphierophiyọ rẹ Avwanre Gan

(Hibru 6:18, 19)

1. Ikpe buebun re y'ihworakpọ vwọ h'ebri.
Ayen vw'ẹgba ray'ejobi vwọ tu'odju.
Avwanr'eje mr'ughenghen r'ihworakpọ.
Ayen se sivw'oma rayen rẹ.

(EKUO)

Jir'Ọghenẹ, Uvie na kẹire!

Usuon r'Ọmọ rọyen che si'ojaeriọ no.

O ji che si'umwemw'ejobi vwo no.

E ja yonr'iphirophiyọ nana gan.

2. E je ghwoghwo n'ẹdẹ rode na kẹire.
Ihwo rha cha tan'ẹdẹ na krinọ rẹ.
Jihova che sivw'ihwo rọy'ejobi.
Jir'Ọghenẹ v'une r'aghoghọ.

(Ekuo)

143 *Hẹhẹ Ẹdẹ rẹ Jihova vẹ Akpọ Kpokpọ Na* (Rom 8:20-25)

1. Jihova br'ẹdẹ phiyotọ
Ro che vwo ru'ode rọyen fon,
Ro che vwo tit'usuon rọyen;
Ọke na sikẹri re.

(Ekuo)

*E je muomaphiy'iruo r'Ọghẹnẹ,
E ja hẹrh'akpọ kpokpọ na,
R'Ọghẹnẹ ve phiyọ na.*

2. Jihova br'ẹdẹ phiyotọ
Rọ cha vwo womari Jesu
Vwo ghwo'irumwemwu n'eje,
Ko che rhi phikparobọ.

(Ekuo)

3. Akpọ na vọnre v'ojaeriọ,
J'avwanre vwerosu'Ọghẹnẹ.
Ẹdẹ rode na kẹrire,
Usivwin je kẹrire.

(Ekuo)

1. Irhuẹro ke cha rhoma mr'orẹ,
 Idi'erhọ ke cha rhoma nyẹme.
 Emọ ke cha suine r'aghoghọ,
 As'eje kọ vọn v'erhuvwu.
 Ihwo ri ghwuru che vrẹnushi,
 Akpọ na kọ cha vọn v'ufuoma.

(EKUO)

*Wọ cha mr'ebruphiyọ nan'eje,
 Wọ da tẹnrovi osa na.*

2. Ubido v'erhuẹn ke cha riemu,
 Okorhi v'ẹvwe ke cha heha.
 Ayen che nyupho r'omotete,
 Ọmọ na ko che su'ay'eje.
 Uvweri v'oviẹ gbe cha dia rẹ.
 Emiavwe v'oshọ gbe cha dia rẹ.

(Ekuo)

145 *Ive rẹ Iparadaisi rẹ Ọghẹnẹ Veri*

(Luk 23:43)

1. Akpọ kpokpọ y'Ọghẹnẹ veri,
Womar'usuon ri Kristi na,
O che si'oja v'umwemwu'eje no,
O che si'ughwu v'emianvwe no.

(Ekuo)

*Avwanre cha di'akpọ kpokpọ.
Ive nana, mu'avwanr'ero.
Jesu Kristi che ru'ọhọre
R'Ọsẹ rọyen vwọ k'akpọ na.*

2. Vw'omọke křen, Ọmọ r'Ọghẹnẹ
Cha kpar'ihwo vwo vřenushi.
Ka mr'orugba r'ive ri Jesu:
'Me v'owẹ dia vw'Ipardais.'

(Ekuo)

3. Akpọ kpokpọ, yin Kristi veri.
Ọ cha di'Ovie r'akpọneje.
Ja vw'akpẹvwẹ vwọ ki Jihova,
Sune jiro v'ubiudu'eje.

(Ekuo)

**‘E Ru Erɔnvwɔn Ejobi
Phiyɔ Ọkpokpọ’
(Evwɔphia 21:1-5)**

1. ‘Eka ra mrẹ na’ djephia ni Jesu suẹn.
Jihov’Ọghẹnẹ yen vwerọ mu’Ovie.
Ọ dj’Idẹbono vwo n’odjuvwu re.
E che ru’ọhọre r’Ọghẹnẹ vw’akpọ.

(EKUO)

Ghọghọ! Uvie na totọ re.

‘Ghẹnẹ v’ihwo cha dia kugbe.

Ovie kugb’emiavwe rha cha dia rẹ,

Ughwu kugb’uvweri rha cha dia rẹ.

Ọghẹnẹ che ru’emu’eje kp’ọkpokpọ.

Eta nana muẹro dẹn.

2. Ihw’eje cha mri Jerusalem kpokpọ;
Ọnana y’ọpha ri Jesu Kristi.
Ọ vw’erɔnvwɔn r’eghanghanre vwọ sẹn,
Jihova yen cha di’urhukpẹ rọyen.

(Ekuo)

3. Orere nana che vw’erhuvwu mamọ.
E che rhi’ẹchẹ rọyen t’ason t’uvo.
Egborho na cha yan vw’elo rọyen,
Idibo r’Ọghẹnẹ dj’elo na phia.

(Ekuo)

1. E vuve r'arhọ ri bẹdẹ.
 Akpọ na cha dia bẹdẹ.
 Evwata cha ri'akpọ kuoma.
 Ive nana muero.

(EKUO)

*J'avwanre davwengba
 Vwo vw'arhọ ri bẹdẹ.
 Eta ri Jihova,
 Eje che rugba.*

2. Vwevunr'iparadaisi na,
 Avwanre cha di'omuvwiẹ.
 Vw'otọ r'usuon ri Jihova,
 Ufuoma kọ cha dia.

(Ekuo)

3. A cha kpar'ihwo vrenushi,
 Oviẹ v'uvweri che no.
 Oghẹnẹ che dj'ẹguonọ phia,
 O che si'ojaeriọ no.

(Ekuo)

1. Jihova, wẹwẹ y'Ọghẹnẹ ri bẹvwẹdẹ.

Odjuvwu v'akpọ na

Vọnre v'emama wẹn.

Ọghẹn'ọfa herọ rẹ, re che se vwo

dje we rẹ.

Irumwemwu che no.

(EKUO)

Jihova cha vw'usivwin k'ihwo rọyen.

Ay'eje cha riẹn no vw'ẹgba kugb'ogangan.

Fiudugberi, vw'esegbuyota,

ghwoghwo ọrho

Ri Jihova, Vw'ujiri

vwọ k'odẹ rọyen na.

2. Mi de hirharok'ughwu, wẹ mi kperi se,

“Jihova kẹ vw'ẹgba,

kugb'uduefiogbere.”

Biko gbe ny'oyare mẹ vw'obodjuwu;

“Ọghẹnẹ,

Vw'ukẹcha vwọ kẹ vwẹ.”

(Ekuo)

3. Jihov'Ọghẹnẹ che kperi
n'odjuvwu rhe,
Ivwighrẹn cha djoshọ,
ihwo wẹn cha ghọghọ.
Jihova che ru'ọhọre rọy'ejobi,
ka cha mọ
no che sivw'avwanre.

(*Ekuo*)

1. Sune k'Ọghẹnẹ. Vw'urinrin k'ode ri Jihova.

Isodje ri Fero, Ọ ghwọr'ay'eje vw'urhie.

Jiri Jihova;

O vw'Ọghẹn'ọfa re vwo dje rẹ.

Wẹwẹ yin me vw'ẹgba;

Jihova ọy'ode wẹn.

(EKUO)

Jihov'Ọghẹnẹ ro me vw'ẹgba,

Wẹw'ovo y'Ọghẹnẹ ri bẹvwẹdẹ.

Wọ cha ghwọr'ivwighrẹn wẹn n'ejobi,

Ku wo che ru'ode wẹn fuanfon.

2. Ẹgborho n'ẹje Kuomakugbe vwọsui Jihova.

Dede n'ayen vw'ogangan,

Wo vw'ẹgba vr'aye'je.

Wo brorhiẹn nure;

Wọ cha ghwọr'ayen vw'Amagidọn.

Ihw'ẹje ke cha riẹn

Ni Jihova y'ode wẹn.

(Ekuo)

Guṇọ Ọghẹṇẹ
Vwọ kẹ Usivwin Wẹn
 (Zẹfanaya 2:3)

1. Ẹgborho n'ejobi

Kuomagbe vwosui Jesu.

Ọke r'Ọghẹṇẹ vwọ k'usuon

R'ihworakpọ t'oba re.

Usuon rayen rere,

Uvie r'Ọghẹṇẹ rhire.

Jesu cha ghwọr'ivwighrẹn rọyen.

Ọke na sikẹri re.

(EKUO)

Guṇọ'Ọghẹṇẹ k'usivwin wẹn,

Wọ me je nabọ vwerosuọ.

Gba guṇọ'ọvwata,

Vw'esegbuyota,

K'ẹbẹre r'usuon r'Ọghẹṇẹ.

Ku wọ cha mr'ẹgba r'Ọghẹṇẹ

Ro vwo sivw'uwe.

2. E che ghwoghwota na
Vwọ k'ihworakpọ n'eje.
T'ayen nyori yẹrẹ senre,
Ay'ovo cha jojẹ na.
Edavwini cha rhe,
J'oshọ che mu'avwanre rẹ.
Jihova vwẹrot'ihwo rọyen,
O che ny'ovie r'avwanre.

(Ekuo)

1. Ihworakpọ re di'otorakpọ na,
 E sa di'akpọ na kre rẹ.
 Akpeyeren r'ohworakpọ gron rẹ,
 Ọ ke je vọn v'uvweri.
 Siẹ'ohwo de ghwu, kọ sa rhoma dia?
 Ny'obo r'Ọghẹnẹ veri:

(EKUO)

*O che se, irivwin ki nyo.
 K'ayen che vřenushi rhe.
 Kidie o vw'owenvwe na
 Vwọ k'iruo r'obọ rọyen.
 Vw'imuẹro, jo gbewunu rẹ.
 Ọghẹnẹ cha kpar'ihwo.
 Ke che vw'arhọ ri bẹdẹ.
 Ọy'iruo r'obọ rọyen.*

2. Idibo r'Ọghẹnẹ da tobọ ghwu,
 Ọ je cha hwosa k'ayen.
 Ọghẹnẹ cha karophiy'ay'eje,
 Ọ cha rhonvw'ayen nushi.
 Ihw'eje ke cha mr'akpọ kpokpọ na.
 Ke che vw'arhọ ri bẹdẹ.

(Ekuo)

Iyovwinreta:

A Yonron Iphierophiyọ rẹ
Avwanre Gan 142
'Aghoghọ rẹ Jihova' 110
Akpeyeren rẹ Okobaro 81
Asan Ra Vwẹ Odẹ Wẹn Se 92
Avwanre Guṇṇọ Omaeriensuon 121
Avwanre Iseri rẹ Jihova! 63
Avwanre Isodje rẹ Jihova 71
Avwanre Kpẹvwẹ Owẹ, Jihova 46
Avwanre Rhe Dia Oṣo Re 132
Avwanre Sero rẹ Ubiudu Avwanre 36
Avwanre Vwomakpahoto kẹ Oghenẹ! 51
Biko Nyo Erhovwo Mẹ 41
Bruphiyọ Emẹvwa rẹ Avwanre 93
"Cha Otu rẹ Ewiewe Uko" 102
Chirakon te Oba 128
'Davwen Wọ Mrẹ nẹ Jihova Yoma' 80
Dede Ayen Vwọrẹ Eguṇṇọ 100
Dede Ohwohwo 85
Dia Ugbeyan rẹ Jihova 28
Dje Odavwaro Phia Fikire Ota rẹ
Oghenẹ 94
Dje Odavwaro Phia Vwọ kẹ
Otanhirhe Na 18
E Dje Emọ rẹ Oghenẹ Vwophia 27
E jẹ Avwanre Chirakon 129
E jẹ Avwanre Vwo Esegbuyota 119
'E Ru Erṇvwon Ejobi Phiyọ
Okpokpo' 146
E Vuve rẹ Arhọ rẹ Bẹdẹ 147
"Ebruba kẹ Ihwo ri Ni Aruṣṣon" 125
Emama na Jiri Oghenẹ 11
Emọ, Eyen Okẹ Oghenẹ Vwọ kẹ
Avwanre 134
Emu Ovṇvṇvṇ rẹ Qrovvori Na 19
Erhuvwu rẹ Uyovwin Esha 138

Eshare re Vwo Ruṣe kẹ Avwanre 103
Eya re Fuevun, Eya re Dia Inenikristi 137
Egba, Iphierophiyọ, vẹ Imuero rẹ
Avwanre 3
Eguṇṇọ rẹ Oghenẹ Ro Jẹ Rheriẹ 108
Erhovwo rẹ Akpẹvwẹ 43
Erhovwo rẹ Odibo rẹ Oghenẹ 42
Erhovwo rẹ Ohwo ro Muomaphiyọ 44
Erhovwo rẹ Omaṣvwoṣpahoto 50
Ewẹn rẹ Oghenẹ Yen Vwo Si Baibol Na 98
Fuevun Okieje 124
Ga Jihova vẹ Ewẹn Wẹn Eje 37
Ga Jihova Vwẹ Okẹ rẹ Eghene 133
Gba Ka Guṇṇọ Uvie Na 21
Ghwoghwo Iyẹnṣen Esiri Na 66
"Ghwoghwo Ota Na" 67
Ghwoghwo Uyota rẹ Uvie Na 72
Ghwoghwo Vwọ kẹ Ihwo Ejobi 57
Guṇṇọ Igbeyan rẹ Ufuoma 58
Guṇṇọ Ihwo ri Fori 70
Guṇṇọ Oghenẹ Vwọ kẹ Usivwin Wẹn 150
Herhẹ Eḍe rẹ Jihova vẹ Akpọ
Kpokpo Na 143
Idjuvwu na Ghwoghwo Urinrin rẹ
Oghenẹ 6
Igbewwunu rẹ Arhọ 141
Ihwo ra Jereyọ Na 25
Iniṣvo Buebun 99
Iroro rẹ Ubiudu Mẹ 45
Iruemu rẹ Jihova 1
Iruo rẹ Eguṇṇọ rẹ Avwanre 91
Iruo rẹ Igbunu rẹ Oghenẹ 5
Ive rẹ Arhọ rẹ Bẹdẹ 140
Ive rẹ Iparadaiṣi rẹ Oghenẹ Veri 145
"Jẹ Urhukpẹ Wẹn La" 82
Jihova Cha Hwa "Osa rọ Vṇṇe"
kẹ Wẹ 136
Jihova kẹ Ohwo Usivwin 148
Jihova, Oghenẹ rẹ Ufuoma 112
Jihova, Oghenẹ ro Me Kpenu 12
Jihova, Oyehe Ogangan rẹ Avwanre 7
Jihova Ton Usuon Phiyọ Re 23
Jihova Yen Adjarhọ rẹ Avwanre 8

Jihova Yen Ode Wẽn 2
 ‘Jihova Yen Osun Me’ 4
 Jihova Yen Ovie re Avwanre! 9
 Jiri Jihova! 10
 Jiri Jihova Fikire Omo Royen ro
 Wwo Mu 16
 Jiri Ovie Kpokpo ro Che Sun Akpo Na 14
 Jiri Omokpako re Jihova! 15
 Ju Vwe Rien Idjerhe Wẽn 88
 Ka Ebere re Jihova! 32
 Kerho, Nyeme, Wo Mre Ebruphiyo 89
 Ke Avwanre Uduefiogbere 73
 Kon Ubi re Uvie Na 68
 Kristi, Oniru Avwanre 13
 Mavo Yen Oma Ru We? 76
 Me Cha Yonre Gan 34
 ‘Me Guonore’ 17
 “Mevwe na! Ji Vwe!” 75
 Mre Oma Wẽn Vwe Akpo Kpokpo Na 139
 Mu Oghwa Wẽn ke Jihova 33
 Mudia Gan Wo Yeghe-e! 122
 Nene Jihova Yan Kede Kede 48
 Nene Oghene Yan Kugbe! 31
 Nene Uvwe Jiri Jihova 59
 “Ne Uwevwi Kpo Uwevwi” 83
 Nerhovwo ke Jihova Kede Kede 47
 O Che Se 151
 O Che Sivwin Ayen 60
 Obo re Nerhe Avwanre Ghoghoh 111
 “Obo re Oghene Tan Kugbe Nu” 131
 Ofori ne E Yono Avwanre 86
 Ogangan re Uruemu Esiri 116
 Oka re Ohwo ro Fori ne Me Dia 127
 Okere Ewen Ofuanfon re Oghene 104
 Omaevwokpahoto re Inenikristi 52
 Ono Yen Oghene Wẽn? 40
 Ota re Oghene Yen ke Ohwo Arho 97
 Owan Djoshoh Raye-en! 55
 Owan Ruro ke Vwe 26
 O Cha Bon We Gan 38
 Obe re Oghene—Efe 96
 “Oghene he Eguono” 105
 “Onana He Idjerhe Na” 54

Ose Me, Oghene Me Kugbe
 Ugbeyan Me 30
 Phiuduphiyo Ohwohwo Awosho 90
 Re Vwo Muegbe re Aghwohwo 53
 Rherhe, Mudia Gan, Gan Oma 126
 ‘Ru Esegbuyota Avwanre Ganphiyo’ 118
 Ru Ubiudu re Jihova Ghoghoh 49
 Ru Uyota na Phiyo Oromoboh Wẽn 56
 So Une re Uvie Na! 74
 Tenrovi Obo re Ma Ghanre 35
 Tenrovi Osa Na! 144
 Udje re Eguono re Jihova 107
 Ufuoma re Avwanre Vwori 113
 Une Kpokpo Na 62
 Une re Ophikparoboh 149
 Urhukpe na Lo Ganphiyo 95
 Urhukpe Vwe Akpo re Ebri 77
 Uruemu re Uyoyovwin 117
 Uvi Oyare re Jihova: “Ghwanre,
 Omo Me” 135
 Uvie na Suen Re—E je O Rhe! 22
 Vwe Ukecha Phia 84
 Wwrokere Omaevwokpotoh re Jesu 120
 ‘Wwo Edirin’ 114
 Wwo Eguono Ogangan ne
 Ubiudu Rhe 109
 Wwo Ghovwo 130
 Wwo Odavwaro Kpahlen Odirin re
 Oghene 115
 Wwo Omamoh Ode Vwe Ero re Oghene 39
 Wwo Uruemu re Eguono 106
 Wwoboh Vwe Orho Na 64
 Wwomakpotoh ke Usuon re Oghene 123
 Wian Kugbe ve Oyerinkugbe 101
 Wo Siobonu Omo Oghanghanre Wẽn 20
 Yan Phiaro! 65
 Yan Phiaro, Owan Iseri! 61
 Yanran re Ghwohwo Uvie Na! 69
 Yanrhe Ugbenu re Jihova 24
 Yanrhe! Wo Vwo Urovwoma 87
 Yeren Akpo ro Fo Ode re Avwanre 29
 Yono Ayen, Ayen Vwo Mudia Gan 79
 “Yono Ota re Oghene” 78

